




Kodak Color Control Patches



增修甘泉縣志卷十一

甘泉縣知縣吳鄂峙

張宏運

陳觀國

揚州府教授李保泰續

徐成勳 桂正華

增訂

人物志上

漢召平廣陵人為陳勝徇廣陵未下聞陳勝敗走秦將章邯且至乃渡江矯陳王令拜項梁為楚上柱國曰江東已定急引兵西擊秦梁迺以八千人渡江而西漢書項籍傳

劉瑜字季節廣陵人高祖父廣陵靖王父辯清河太守

瑜少好經學尤善圖讖天文歷算之術州郡禮請不就
延熹八年太尉楊秉舉賢良方正到京師上書陳事特
詔瑜問災咎之徵指事案經讖以對執政者欲令瑜依
違其辭而更策以他事瑜復悉心以對入千餘言而帝
竟不能用拜爲議郎及帝崩大將軍竇武欲誅宦官引
瑜爲侍中共同謀畫武敗被誅子碗傳瑜學明占候能
著災異舉方正不行

後漢書本傳

劉熊字孟陽廣陵人光武帝之曾孫廣陵王之孫俞鄉
侯平之季子守約履勤叡敦五經仕爲酸棗令旣練州
部卷舒委蛇賞善礪頑勤恤民隱貪究革情修勸德慕

德惠潛流鬯芳旁布吏民愛之若慈母畏之如神明相
與採摭謠言刊之碑石

金石古文

徐璆字孟玉廣陵人少博學辟公府舉高第稍遷荊州
刺史時董太后姊子張忠爲南陽守因勢放濫贓罪數
億璆當之郡太后遣中常侍以忠屬璆璆對曰臣身爲
國不敢聞命太后怒遽徵忠爲司隸校尉以相威臨璆
至州舉奏忠贓至億使冠軍縣主簿詣大司農陳其罪
又奏五郡守及屬縣有贓污者悉徵案罪威風大行中
平元年與中郎將朱儁擊黃巾賊於宛破之張忠怨璆
與諸閹宦構詞中之璆遂以罪徵以破賊功得免官歸

家後再徵遷汝南太守轉東海相所在化行獻帝遷許
以止尉徵道爲袁術所劫授璆以上公璆嘆曰龔勝鮑
宣獨何人哉守之必死術不敢逼術死軍破璆得其盜
國璽及還許上之并還前所假汝南東海二郡印綬司
徒趙溢謂璆曰君遭大難猶存此耶璆曰昔蘇武困於
匈奴不墜七尺之節况此方寸印乎後拜太常寺卒於
官

後漢書

袁綏廣陵人爲漢太傅椽廣陵太守張超討董卓以綏
領廣陵爭子廸單貧有志與陳國陳融陳留濮陽逸沛
郡蔣纂皆就吳丞相陸遜弟瑁遊處廸孫暉字思光作

獻帝春秋

三國志合魏書

三國陳矯字季弼廣陵人本廣陵劉氏爲外祖陳氏撫
養因改姓陳避亂江東及東城辭孫策袁術之命還本
郡太守陳登辟爲功曹時廣陵爲孫權所圍登令矯求
救於曹操矯說操操乃遣兵赴救吳軍旣退操辟矯爲
司空椽除相令歷魏郡西部都尉遷魏郡太守時繫囚
千數至有歷年矯悉覽罪狀一時論決不立封高陵亭
侯遷尙書令丕子叡立進爵東鄉侯一日叡猝至尙書
門矯跪問曰陛下欲何之曰欲案行文書耳矯曰此是
臣職分非陛下所宜臨也若臣不稱職識請黜退叡慙

回車其亮直如此加侍中光祿大夫遷司徒卒謚貞侯

魏志

陳本矯子也歷位郡守九卿所在操綱領舉大體能使羣下自盡有統御之才不親小事不讀法律而得廷尉之稱優於司馬岐等精練文理遷鎮北將軍假節都督

河北諸軍事薨子粲嗣

魏志

徐宣字實堅廣陵人曹操辟爲司空掾屬會馬超亂操將西征見官屬曰今當遠征宜得清公大德以鎮統之乃以宣爲左護軍留統諸軍還爲丞相東曹掾出爲魏郡太守丕立爲御史中丞賜爵關內侯轉散騎常侍從

至廣陵六軍乘舟風浪暴起丕船回倒宣方病獨凌波而前丕壯之遷尚書獻立封津陽亭侯加侍中光祿大夫嘗上疏陳威刑大過又諫作宮殿窮盡民力皆手詔嘉訥及卒遺令布衣疏巾斂以時服追贈車騎將軍謚

貞侯

魏志

徐彪字仲虞廣陵人仕吳爲選曹郎夙與張溫同意數交書疏聞問往還

吳志

張紘字子綱廣陵人少遊學京師還本郡舉茂才公府辟皆不就避難江東孫策創業遂委贄焉表爲正議校尉從討丹陽策身臨行陣紘諫不宜輕敵願麾下重天

授之姿副四海之望無令國內上下危懼建安四年策遣紘奉章至許留爲侍御史曹公聞策薨欲伐吳紘以爲乘人之喪非古義不如因而厚之曹公從其言卽表權爲討虜將軍令紘輔權內附出紘爲會稽東部都尉後權以紘爲長史從征合肥權率輕騎突敵紘諫止不行又建計宜出都秣陵權從之令還吳迎家道病卒臨困授子靖留牋以人情憚難趨易好同惡異與治道相反而忠臣挾難進之術其不合宜也故明君受諫抑情損欲以義割恩宜加三思以成仁覆之大時年六十卒權省書流涕子平官至南郡太守尚書平子尚孫皓時

爲侍郎擢侍中中書令皓使尚鼓琴尚對不能皓不悅吳 皓嘗問尚詩云汎彼柏舟惟柏中孚乎尚對曰詩言檣楫松舟則松亦中舟也又問烏之大者惟鶴小者惟雀乎尚對曰大者有禿鶩小者鷦鷯皓性忌勝已而尚談論美出其表積以致恨後問孤飲酒可方誰尚對曰陛下有百觚之量皓云尚知孔邱之不王而以孤方之因此發怒收尚尚書岑昏率公卿已下百餘人詣宮叩頭請罪尚得減死 環氏吳紀

衛旌廣陵人字子旗與步騭同年相善俱以種瓜自給晝勤四體夜誦經傳官至尚書 吳書步騭傳

劉儁字幼節遷宛陵令到官二年政治清平爲吏民所親縣時有友人相過者主人歡喜爲具持刀捕犬因誤中客客死其家訢縣平法者云主人本有殺心應當伏辜儁曰聞許太子至孝以不嘗藥之誤史官書其弒君曰盡心力以事君父舍藥物可也今主人與客本無仇恨但歡喜爲供有親愛飲食之意無傷害之心不幸而死當以周禮過誤平之奈何欲用法律所失一時兩殺不辜主法者拘有舊例不聽儁曰界有失禮之民皆令之罪也解印綬去

廣陵烈士傳

華融字德蕤廣陵江都人祖父避亂居山陰藥山下時

皇象亦寓居山陰吳郡張溫來就象學欲得所舍或告溫曰藥山下有華德蕤者雖年少美有令志可舍也溫遂止融家朝夕談講俄而溫爲選部尙書乃擢融爲太子庶子遂知名顯達融子譚黃門郎次子譚以才辯稱

文士傳

范慎字孝敬廣陵人竭忠知己之君纏綿三益之友時人榮之著論二十篇名曰矯非後爲侍中出補武昌左都督治軍整頓孫皓移都甚憚之詔曰慎勳德俱茂朕所敬憑宜登上公以副眾望以爲太尉慎自恨久爲將遂託老耄軍士戀之舉營爲之隕涕鳳皇三年卒

吳錄

晉劉頌字子雅廣陵人漢廣陵厲王胥之後世爲名族
同郡有雷蔣穀魯四姓皆出其下時人爲之語曰雷蔣
穀魯劉最爲祖父觀平陽太守頌少能辨物理爲時人
所稱察孝廉舉秀才皆不就文帝辟爲相府掾奉使於
蜀蜀新平人饑土荒頌表求賑貸不待報而行由是除
名武帝踐阼拜尙書三公郎典科律申冤訟累遷中書
侍郎咸宣中詔頌與散騎郎白衷巡撫荆揚以奉使稱
旨轉黃門郎遷議郎守廷尉時尙書令史扈寅非罪下
獄詔使考竟頌執據無罪寅遂得免時人以頌比張釋
之在職六年號爲詳平會滅吳諸將爭功遣頌校其事

以王渾爲上功王濬爲中功帝以頌持法失理左遷京
兆太守不行轉任河內臨發上便宜多所納用郡界多
公主水碓遏塞流水轉爲浸害頌表罷之百姓獲其便
利尋以母憂去職服闋除淮南相在官嚴整甚有政績
舊修芍陂年用數萬人豪彊兼并孤貧失業頌使大小
戮力計功受分百姓歌其平惠元康初從淮南王先入
朝會誅楊駿頌屯衛殿中其夜詔以頌爲三公尙書又
上書論律令事爲時論所美久之轉吏部尙書建九班
之制欲令百官居職希遷考課能否明其賞罰賈郭專
朝仕者欲速竟不施行及趙王倫害張華孫秀等推崇

倫功宜加九錫百僚莫敢異議頌獨曰昔漢之錫魏魏之錫晉皆一時之用非可通行今宗廟又安雖嬖后被退勢臣受誅周勃誅諸呂而尊孝文霍光廢昌邑而奉孝宣並無九錫之命違舊典而習權變非先王之制倫黨將害之孫秀曰誅張裴已傷時望不可復誅頌乃止於是以前頌爲光祿大夫門施行馬尋病卒使使者弔祭賜錢二十萬朝衣一具謚曰貞頌無子養弟和子雍早卒更以雍弟詡子隲爲適孫襲封永康元年詔以頌誅賈謐督攝眾事有功追封梁鄒縣侯食邑千五百戶頌弟彪字仲雅參安東軍事伐吳獲張悌累官積弩將軍

及武庫火彪建計斷屋得出諸寶器歷荊州刺史次弟仲字世混歷黃門郎滎陽太守未之官卒

晉書本傳

陳騫字休淵魏司徒矯子起家尚書郎遷中山安平太守並著政績後封安國亭侯又進廣陵侯復封郟侯咸宣初轉大司馬言胡烈牽宏皆勇無謀強於自用非綏邊材後果失羗戎之和皆被寇喪歿征討連歲而稍定騫少有度量含垢匿瑕累處方任爲士庶所懷年老求入朝乞骸骨許之位同保傅賜以几杖不朝安車駟馬聽乘輿上殿薨年八十一贈太傅謚曰武

晉書曰

華譚字令思廣陵人譚期歲而孤母年十八守節鞠養

勤勞備至及長好學不倦爽慧有口辨揚州刺史周浚引爲從事愛其才器待以賓友之禮太康中刺史嵇紹舉譚秀才譚至洛陽武帝親策之尋除郎中遷太子舍人本國中正以母憂去職服闋爲鄆城令過濮水作莊子贊以示功曹而廷掾張延爲作答教其文甚美譚異而薦之遂見升擢及譚爲廬江延已爲淮陵太守又舉寒族周訪訪果立功時以譚爲知人以父墓毀去官尋爲尙書郎出爲邾令兵亂之後譚傾心撫卹甚有政績再遷廬江內史加綏遠將軍時石冰之黨陸珪等屯據諸縣譚遣司馬褚敦討平之又遣別軍擊冰都督孟徐

獲其驍卒以功封都亭侯食邑千戶揚州刺史劉陶素與譚不善因法收下壽陽獄鎮東將軍周馥與譚素相親善理而出之及甘卓討馥百姓奔散謂譚已去遣人視之而更移近馥馥歎曰吾嘗謂令思是臧子源之儔今果效矣建興初元帝命爲鎮東軍諮祭酒譚博學多通在府無事乃著書三十卷名曰辨道上牋進之帝親自覽焉轉丞相軍諮祭酒領郡大中正譚薦于寶范珣於朝乃上牋求退不聽太興初拜前軍以疾復轉秘書監久之加散騎常侍屢以疾辭及王敦作逆譚不能入省坐免卒於家贈光祿大夫加散騎常侍謚曰明二子

化茂化字長風爲征虜司馬討汲桑戰沒茂嗣爵同上
閔鴻廣陵人少與丹陽薛兼紀瞻吳郡顧榮會稽賀循
齊名號爲五儁初入洛司空張華見而奇之曰皆南金
也晉書薛兼傳

按鴻見二陸奇之曰此兒若非龍駒當是鳳
雛見晉書陸雲傳舊志作吳志誤

潘京廣陵人素有理鑒名知人戴淵父會稽太守呂雅
重之淵初舉孝廉仕不遂往武陵省父父遣淵往就京
與語旣而京稱淵有公輔之才聲名遂著晉書

戴淵字若思廣陵人祖烈吳左將軍父昌會稽太守著

思有風儀性閒爽少好遊俠不拘操行遇陸機赴洛船
裝甚盛遂與其徒掠之若思登岸據胡床指麾同旅皆
得其宜機察見之知非常人在舫屋上遙謂之曰卿才
器如此乃復作刼邪若思感悟因流涕投劍就之機與
言深加賞異遂與定交後舉孝廉入洛機薦於趙王倫
倫辟之除沁水令不就遂往武陵省父時同郡人潘京
素名知人若思就京與語稱若思有公輔之才累轉東
海王越軍諮祭酒出補豫章太守加振威將軍以討賊
有功賜爵秣陵侯遷治書侍御史驃騎司馬拜散騎侍
郎元帝召爲鎮東右司馬帝爲晉王以爲尙書中興遷

爲中護軍出爲征西將軍都督兗豫幽冀雍并六州諸
軍事假節加散騎常侍發投刺王官千人爲軍吏調揚
州百姓家奴萬人爲兵配之鎮壽陽與劉隗同出帝親
幸其營勞勉將士臨發祖餞置酒賦詩若思至合淝而
王敦舉兵詔追若思還鎮京師進驃騎將軍築壘於大
桁之北石頭失守與諸軍攻石頭王師敗績若思率麾
下百餘人赴宮參軍呂猗時爲臺郎性姦諂若思爲尙
書惡其爲人猗亦深憾焉至是說敦曰周顛戴若思皆
有高名足以惑眾若不除恐有再舉之患敦以爲然收
而害之若思素有重望四海之士莫不痛惜焉賦平冊

贈右光祿大夫儀同三司諡曰簡

晉書本傳

戴邈字望之少好學尤精漢史才不逮若思儒博過之
弱冠舉秀才尋遷太子洗馬出補西陽內史永嘉中元
帝版行邵陵內史丞相軍諮祭酒出爲征南軍司於時
凡百草創學校未立邈上疏曰自頃兗狡鴟張黎元荼
毒禮壞樂崩曠載累紀此有識之所嗟嘆也夫平世尙
文遭亂尙武文武遞用長久之道古之俊乂必三年而
通一經今貴遊之子未必有斬將搴旗之才不及盛年
講肄道義使明珠加磨瑩之功荆璞發採琢之榮不良
可惜乎人情玩於所習純風日去華競日彰今天地告

始聖朝以神武之德篤道崇儒創立大業明主唱之於上宰輔督之於下夫上之所好下必有過之者焉臣謂宜以三時之隙漸就修建疏奏納焉於是始修禮樂代劉隗爲丹陽尹王敦作逆若思遇害邈坐免官敦誅後拜尚書僕射卒官贈衛將軍謚曰穆子謚嗣歷義興太守大司農

同上

高嵩字茂炎廣陵人父悝少孤事母以孝聞年十三值歲饑每致甘肥於母撫幼弟以友愛稱嵩少好學善吏書總角時司空何充稱其明慧充爲揚州引嵩爲主簿益相欽重轉驃騎主簿舉州秀才除太學博士父艱去

職初悝以納妾致訟被黜及終嵩乃自繫廷尉訟寃遂停喪五年不葬表疏數十上帝哀之乃下詔聽傳侯爵由是見稱拜中書郎黃門侍郎簡文帝輔政引爲撫軍司馬時桓溫擅威率眾北伐軍次武昌簡文患之嵩曰宜致書喻以禍福自當返旆如其不爾便六軍整駕逆順於此判矣若有異計請先擊鼓便於坐爲簡文書草致溫溫得書還鎮嵩累遷侍中是時謝萬爲豫州都督疲於親賓相送方臥在室嵩徑造之謂曰卿今疆理西藩何以爲政萬粗陳其意嵩便爲叙刑政之要數百言萬遂起坐呼嵩小字曰阿鄴故有才具耶後以公事免

卒於家子耆官至散騎常侍

晉書

宋梁曠廣陵人爲山陽內史廣陵王誕反執其妻子遣使要曠曠斬使拒之誕怒滅其家及誕平朝廷嘉曠誠節擢爲後將軍

宋書

南齊荀伯玉字弄璋廣陵人祖永南譙太守父闡之給事中伯玉仕宋爲晉安王子勛鎮軍行參軍泰始初隨子勛舉事及事敗還都賣卜自業齊高帝鎮淮陰伯玉爲冠軍刑獄參軍及高帝爲南兗州伯玉從轉鎮軍中兵參軍帶廣陵令初高帝在淮陰伯玉假還廣陵夢上廣陵城南樓上有二青衣小兒語伯玉云草中肅九五

相追逐伯玉視城下人頭皆有草泰始七年又夢高帝乘船在廣陵北渚兩腋下有翅不舒伯玉問何當舒帝曰却後三年伯玉夢中自謂是咒師凡六唾咒之有六龍出兩腋下翅皆舒還復歛元徽三年而高帝破桂陽威名大震五年而廢蒼梧謂伯玉曰卿夢今且効矣昇平初仍爲高帝驃騎中兵參軍帶濟陽太守霸業旣建伯玉忠勤盡心常衛左右加前將軍大見委信齊建元元年封南豐縣子爲豫章王司空諮議太守如故時武帝在東宮自以年長與高帝同創大業朝事大小悉皆事斷多違制度左右張景真偏見任遇又多僭侈伯玉

因武帝拜陵之後密啟之上大怒遣文惠太子聞喜公
子良宣敕詰責并示以景真罪狀使以太子令收景真
殺之高帝重伯玉盡心愈見信使掌軍國密事高帝臨
崩指伯玉以屬武帝卽位伯玉憂懼止聞之以其與桓
崇祖善加意撫之伯玉乃安永明元年與崇祖並見誣
伏誅初伯玉微時有善相墓者謂其父曰君墓當出暴
貴者但不得久耳又出失行女子伯玉聞之曰朝聞道
夕死可矣頃之伯玉姊當嫁明日應行今夕逃尋求不
能得遂出家爲尼伯玉卒敗亡

宋書本傳

周劉璠字寶義沛人也六世敏以永嘉亂徙居贛陵父

臧性方正篤志好學居家以孝聞仕梁爲著作郎璠九
歲而孤居喪合禮少好讀書兼善文筆十七爲上黃侯
蕭曄所器重後隨曄在淮南璠母在建康遭疾璠弗之
知忽一日舉身楚痛尋而家信至云母病璠卽號泣戒
道絕而復蘇當身痛之辰卽母死之日居喪毀瘠遂感
風氣服闋後一年猶杖而後起及曄終於毗陵故吏多
分散璠獨奉曄喪還都墳成乃退璠少慷慨好功名志
欲立事邊城會宜豐侯蕭修出爲北徐州刺史

蕭修周書作蕭

循今仍北

卽請爲其輕車府主簿兼記室參軍修爲梁

州板爲中記室補華陽太守屬侯景渡江梁室大亂修

以璠有才畧甚親委之時寇難繁興未有所定璠乃唱
然賦詩以見志其末章曰隨會平王室夷吾匡霸功虛
薄無時用徒然慕昔風修開府以璠爲諮議參軍仍領
記室梁元帝永制授樹功將軍鎮西府諮議參軍尋以
修爲雍州刺史復以璠爲修平北府司馬及武陵王紀
稱制於蜀以璠爲中書侍郎遣召璠令長史劉孝勝深
布心腹使工畫陳平渡河歸漢圖以遺之璠苦求還中
記室韋登曰殿下忍而蓄憾足下不留將致大禍璠正
色曰我與府侯分義已定豈以寵辱夷險易其心乎丈
夫立志當死生以之耳紀知不爲已用乃厚贈而遣之

於是遣使拜修爲益州刺史封隨郡王以爲璠府長史
加蜀郡太守還至白馬西屬達奚武軍已至南鄭璠不
得人遂降於武周文帝素聞其名先戒武曰勿使劉璠
死故武先令璠赴闕周文見之如舊謂僕射申徽曰劉
璠佳士古人何以過之徽曰晉人滅吳利在二陸明公
今平梁漢得一劉璠也周文旣納蕭修降又許其反國
修至長安累月未遣璠因侍宴周文曰我於古誰比曰
常以公命世英主湯武莫逮今日所見曾齊桓晉文之
不若齊桓存三亡國晉文不失信於伐原語未終周文
撫掌曰我解爾意卽命遣修修請與璠俱還周文不許

以璠爲中外府記室遷黃門侍郎儀同三司初蕭修在漢中與蕭紀牋及答西魏書移襄陽文皆璠辭也周明帝初授內史中大夫掌綸誥尋封平陽縣子在職清白簡亮不合於時左遷同和郡守璠善於撫御莅職未期生羗降附者五百餘家前後郡守多營以致貲產唯璠秋毫無所取妻子並隨羗俗食麥衣皮始終不改洮陽洪和二郡羗常越境詣璠訟理蔡公廣時鎮隴右嘉其善政及遷鎮陝州欲啟璠自隨羗人樂從者七百人陳公純作鎮隴右引爲總管府司錄甚禮敬之卒於官子

祥

宋史本傳

劉祥字休徵幼聰慧賓客皆號神童事母至孝其伯父黃門郎璠奇之十歲能屬文十二通五經齊公憲召爲記室府中書記皆令掌之封漢南縣子憲進爵爲王除內史上士高祖東征休徵陪侍帷幄平齊露布卽休徵文也累遷大將軍歷長安萬年二縣令頗獲稱譽卒初璠所撰梁典始就未及刊定而卒臨卒謂休徵曰能成我志其在此書乎休徵修定勒成一家行世

周書本傳

劉行本璠兒子也父環仕梁歷職清憲行本起家梁武陵王國常侍遇蕭修以梁州北附遂與叔父璠歸周寓居新豐每以諷讀爲事精力忘疲雖衣食乏絕宴如也

性剛烈有不可奪之志周大冢宰宇文護引爲中外府
記室武帝親督萬機轉御正中士兼領起居注累遷掌
朝下大夫周代故事天子臨軒掌朝典筆硯持至御坐
則承御大夫取進之及行本爲掌朝將進筆於帝承御
復欲取之行本抗聲曰筆不可得帝驚視問之行本曰
臣聞設官分職各有司存臣旣不得佩承御刀承御亦
焉得取臣筆帝曰然因令二司各行所職及宣帝嗣位
多失德行本切諫忤旨出爲河南太守及尉遲迥作亂
攻懷州行本率吏人拒之拜儀同賜爵文安縣子隋文
帝踐祚拜諫議大夫檢校中書侍郎上嘗怒一郎於殿

前笞之行本進曰此人素清其過又小上不願行本正
當上前曰陛下不以臣不肖令臣在左右臣言若是陛
下安得不聽臣言若非當致之於理安得輕臣而不顧
臣所言非私因置笏於地而退上歛容謝之遂原所笞
者時天下大同四夷內附行本以羗人密邇封域上表
劾其使者請付推科上奇其志雍州別駕元肇言於上
曰有一州吏受人饋錢二百文律令杖一百然臣下車
之始與共爲約此吏故違請加徒一年行本駮之曰律
令之行蓋發明詔今肇乃敢重其教命輕忽憲章虧法
取威非人臣之禮上嘉之賜絹百匹拜太子左庶子領

書侍御史如故皇太子虛襟敬憚時唐令則爲左庶子
太子昵狎之每令以弦歌教內人行本責之曰庶子當
匡太子以正道何嬖昵房帷之間哉令則甚慙而不能
改時沛國劉臻平原明克讓河南陸爽等並以文學爲
太子所親行本怒其不能調護每謂三人曰卿等止解
讀書耳時左衛率長史夏侯福爲太子所昵嘗於閣內
與太子戲福大笑聲聞於外行本時在閣下聞之待其
出數之曰汝何小人敢爲褻慢因付執法者推之太子
爲請乃釋之太子嘗得良馬令福乘而觀之太子甚悅
因欲令行本復乘行本正色曰至尊置臣於庶子位欲

輔導殿下以正道非爲殿下作弄臣太子慙而止復以
本官領大興令權貴憚其方正無敢至其門者由是請
託路絕吏人懷之未幾卒於官上甚傷惜之及太子廢
上曰嗟乎若使劉行本在當不及此行本無子同上

唐曹憲江都人研精字學自漢杜林衛宏以後古文亡
絕至憲復興聚徒教授凡數百人公卿多從之游仕隋
爲秘書學士煬帝令與諸儒撰桂苑珠叢一百卷規正
文字又訓註張揖所撰廣雅分爲十卷學者推其該博
命藏秘書貞觀中揚州長史李襲譽薦授宏文館學士
辭以年老不至卽家拜朝散大夫學者榮之太宗常讀

書有奇難字輒遣使就問具爲音注援驗詳復帝咨尚
之卒年百五歲所撰文選音義甚爲當時所重與同郡
魏模公孫羅李善相繼傳授其書遂興句容許淹自浮
屠還爲儒多識廣聞尤精訓詁五人並名家羅官沛王
府參軍無錫丞模武后時爲左拾遺子景倩亦世其學
以拾遺召後歷度支員外郎唐書
上儀字游韶本陝人父宏爲隋江都宮副監因家焉
儀少涉獵經史善屬文貞觀初舉進士太宗聞其名召
授宏文館直學士遷秘書郎時太宗雅好屬文每遣儀
視草與撰晉書轉起居郎高宗嗣位遷秘書少監龍朔

二年加銀青光祿大夫西臺侍郎麟德元年上以武后
專作威福密召儀議之儀奏皇后專恣海內失望宜廢
之以順人心上命草詔左右奔告后后詣上自訴上曰
此上官儀教我耳后使許敬宗誣奏儀與宦者王伏勝
及故太子忠謀大逆下獄死籍其家子庭芝仕歷周王
府屬與儀俱被害庭芝有女爲中宗昭容侍草制誥追
贈儀爲中書令秦州都督楚國公庭芝黃門侍郎岐州
刺史天水郡公以禮改葬同上

李善江都人雅行博學淹貫古今人號爲書簞顯慶中
累擢崇文館直學士兼沛王侍讀爲文選註六十卷敷

析淵詳表上之賜賚優渥除潞王府記室參軍轉秘書
郎乾封中出爲涇城令坐與賀蘭敏之善流姚州遇赦
還居汴鄭間教授諸生多自遠方至傳其業爲文選學

唐書

李邕字泰和揚州江都人父善注文選釋事而忘意書
成以問邕邕不敢對善詰之邕意欲有所更善曰試爲
我補益之邕附事見義善以其不可奪故兩書並行既
冠見特進李嶠自言讀書未徧願一見秘書乃假直秘
書未幾辭去嶠驚試問奧篇隱帙了辯如響嶠嘆曰子
且名家嶠爲內史與監察御史張廷珪薦邕召拜左拾

遺御史中丞宋璟劾張昌宗等反狀武后不應邕立階
下大言曰璟所陳社稷大計陛下當聽后色解卽可璟
奏中宗立鄭晉思以方伎幸擢秘書監邕諫不納五王
誅坐善張柬之出爲南和令貶富州司戶參軍事韋氏
平召拜左臺殿中侍御史彈劾任職人頗憚之譙王重
福謀反邕與治州司馬崔日知捕去黨遷戶部員外郎
岑羲崔湜惡日知而邕與之交元宗在東宮時邕及崔
隱甫倪若水同被禮遇羲等忌之貶邕舍城丞元宗卽
位召爲戶部郎中張廷珪爲黃門侍郎而姜皎方幸共
援邕爲御史中丞姚崇疾邕險躁左遷括州司馬起爲

陳州刺史帝封太山還邕見帝汴州召獻辭賦帝悅邕素輕張說與相惡會仇人告邕贓貸枉法下獄當死許昌男子孔章上書疏奏邕得減死貶遵化尉後從中人楊思勗討嶺南賊有功徙灋州司馬開元二十三年起爲括州刺史喜興利除害復坐誣枉且得罪天子識其名詔勿劾後歷淄滑二州刺史上計京師始邕蚤有名重義愛士久斥外不與士大夫接旣入朝人間傳其眉目瓌異主阡陌聚觀後生望風內謁門巷填隘中人臨問索所爲文章具進上以讒媚不得留出爲汲郡北海太守天寶中左驍衛兵曹參軍柳勣有罪下獄邕嘗遺

勣馬故吉溫使引邕嘗以休咎相語陰賂遺宰相李林甫素忌邕因傳以罪詔就郡杖殺之時年七十年代宗贈秘書監邕之文與碑頌是所長人奉金帛請其文前後所愛鉅萬計邕雖詘不進而文名天下時稱李北海盧藏用嘗謂邕如干將莫邪難與爭鋒但虞傷缺耳後卒如言

唐書本傳

李鄘字建侯邕從孫建中間登進士第又以書判高等補秘書省正字李懷光辟至幕府累擢監察御史懷光反河中鄘與高郢刺賊虛實及所以攻取者白之朝德宗手詔褒答懷光覺嚴兵召詰鄘詞氣不撓懷光囚之

及河中平馬燧破械致禮表佐其府以言不用罷歸洛中召爲吏部員外郎元和後拜淮南節度使王師討蔡鄜以兵二萬分壁鄆境贖餉不仰有司後以吐突承璀薦召拜門下侍郎同中書門下平章事鄜不喜由宦官倖進至京師引疾固辭改戶部尚書俄檢校尚書左僕射兼太子賓客分司東都以太子少傅致仕卒贈太子

少傅諡曰肅

唐書

王播字明敷其先太原人父恕爲揚州參曹倉軍遂家焉播與弟炎起皆有名並擢進士播起舉賢良方正異等補盩厔尉以善治獄御史中丞李汶薦歷侍御史爲

三原令豪疆犯法未嘗輒貸歲終課最德宗將擢以要近會母喪解還除駕部員外郎遷工部郎中知御史雜事刺舉不阿有能利關中饑諸鎮或閉糴播以言言三輔不乏歷虢州刺史擢御史中丞歲終改京兆尹時禁屯列畿內者姦人冒之以剽劫又勳戚家馳獵近郊播請一切呵止盜賊不能隱皆走出境憲宗以爲能進刑部侍郎領諸道鹽鐵轉運使是時天下多故大理議讞科條叢繁播悉置格律坐隅商處重輕剖決如流吏不能竄其私帝討淮西切於饋餉播哀財用以給軍興兵得無乏帝嘉其功超拜禮部尚書皇甫鏞用事更忌播

罷守本官久之檢校戶部尚書爲劍南西川節度使長慶初召爲刑部尚書復領鹽鐵進中書侍郎同中書門下平章事時以檢校尚書右僕射出爲淮南節度使沙七里港以便漕引後賴其利敬宗卽位卽拜檢校司空遂復領使文宗立就進檢校司徒太和元年入朝拜左僕射復輔政累封太原郡公時韋處厚當國以獻替自任天子嚮之播專以錢穀進不甚與事居位四年卒年七十二贈太尉謚曰敬播少孤貧自刻苦至成立居官以疆濟稱天性勤吏職每視簿領紛積於前人所不堪者播反用爲樂所署吏苟無大罪以虛勞增秩而已卒

不易所職雅善占奏雖數十事未嘗書於笏云

漢書本傳

王起字舉之播弟貞元中擢進士與播並舉賢良方正異等元和末累遷中書舍人數上疏規諫穆宗畋遊拜禮部侍郎宣武押牙李齊叛起與播俱上疏請詔王智興討之卒定其亂以戶部尚書判度支靈武邠甯多曠土奏爲營田以省餽輓歷河中節度使方蝗旱粟價騰踊起下令家得儲三十斛斥其餘以市否者死神策士怙勢不從寘於法由是膾積戢出民賴以生授檢校尚書右僕射爲山南東道節度使濱漢多塘堰聯屬民弗完治起至部修復遂無凶年會昌中命典貢舉進尚書

左僕射封魏國公凡四舉士多知名人服其鑒卒年八十八贈太尉諡文懿起性友悌居播喪哀戚加於人尤嗜學非寢食不輟廢

同上

王龜字大年起之子性高簡武宗知其名以左捨遺召不赴崔瑀觀察宣歙表爲副龜樂宛陵山水從之咸通中改太常少卿同州刺史牙將白約素暴橫嘗譁言月廩薄以動士心爲亂龜捕殺之人皆震慄徙浙東觀察使卒贈工部尚書子堯力學有文辭以鐸當國不貢進士終右司員外郎

同上

王式起之子以廕爲太子正字擢賢良方正累遷殿中

侍御史大中中爲晉州刺史會河曲大歉民流徙他州式勞卹之活數千人徙安南都護初交趾數有變懼式威不自安譁曰黃頭軍將度海襲我矣相率夜圍城合譟請都護北歸我當抗黃頭軍

黃頭軍志武戌卒也

式徐被甲引

家僮乘城責讓叛者走翌日盡捕斬之初容管災歉不

歲貢式始上輸大犒宴軍中歸質外蕃而占城真臘慕

義悉入獻亦還所掠王民甯國劇賊仇甫亂明越觀察

使不能討宰相選式往代式發聞賊用騎兵乃集土團

諸兒爲向導擒甫斬之餘姚民徐澤專魚鹽之利慈溪

民陳瑊冒名仕至縣令皆豪縱州不能制式窮治其姦

皆榜死咸通三年徐州銀刀軍亂以式檢校工部尚書
徙武甯節度使視事三日悉以計誅亂兵終左金吾大
將軍同上

王鐸字昭範式之子會昌初擢進士第累遷御史中丞
中和元年拜同平章事二年黃巢陷長安鐸請討賊乃
以爲諸道行營都統移檄天下時諸將環賊莫敢先發
鐸檄至號令肅然將士皆奮巢勢日蹙宦者田令孜料
賊必破欲功出北司乃搆鐸於帝罷爲檢校司徒義成
節度使鐸功幾就而以讒見奪然卒因其勢收復京師
四年徙義昌節度使過魏州樂從訓利其輜重侍妾伏

兵高雞泊劫殺之以遇盜聞朝廷不能誥天下痛惜焉

上同

續志考正唐王鐸係播弟炎之子誤作式子式爲
播弟起之子與鐸從兄弟也

李礪字景望鄜之孫也大中末登進士累遷戶部郎中
分司東都劾奏內園使郝景全不法事黃巢陷洛礪挾
尚書八印走河陽時畱守劉允章爲賊脅遣人就礪索
印拒不與襄王之亂礪流寓淮南高駢受僞命礪苦諫
不納入翰林學士辭職歸乾寧元年召進禮部尚書同
中書門下平章事崔昭緯素疾礪諷劉崇會劾之下遷

太子少傅復爲李茂貞等所論又罷爲太子少師上猶注意復用之及王行瑜韓建擁兵闕下列礮罪殺之都亭驛行瑜誅詔贈司徒謚曰文礮嗜學家有書至萬卷世號李書樓所著文章及注解諸書傳甚多

同上

五代嚴可求同州人遷江都少爲吳幕僚吳王歿張顥欲自立厲聲謂諸將曰軍府誰當主者三問莫應可求前密啟曰方今四境多虞非公主之不可然今日則恐太速顥默然可求急趨出書一紙內袖中麾同列往使宅賀眾莫測既出教宣之乃吳王母史太夫人教也大畧言隆演當次立諸將宜無負楊氏辭旨激切顥氣色

皆沮以其義正不敢奪吳王隆演乃得立顥知爲可求所賣夜遣盜刺之可求度不免請爲書辭府主盜執刀臨之可求操筆無懼色盜粗能識字見其辭氣忠壯曰公長者吾不忍殺遂舍之去南唐時歷遷門下侍郎尙書右僕射同平章事

同上

嚴續字興宗馮翊人祖實仕故唐爲江淮水陸轉運州官徙家廣陵父可求爲吳武王謀臣宣王建國可求爲尙書左僕射同平章事太和二年卒續十餘歲以父廕補千牛備身遷秘書郎尙烈祖女生長富貴而性恭謹歷兵部侍郎尙書左丞元宗卽位進禮部尙書中書侍

郎出牧池州復拜中書侍郎兼三司使又出爲江州節度使數年復入知尙書省遂爲門下侍郎同平章事初續之未出池州也宋齊立專國公卿多附之惟續持正不爲屈元宗嘗曰大臣惟嚴續能自立然才短恐不能勝其黨後卒爲黨人所排與夢錫俱補外及爲相雖盡忠不貳然寡學識聽用多非其人不能稱職或作螃蟹賦以譏切之屬疾還都已革猶不亂與客言論如平時後主使內夫人問之歷陳羣臣邪正某當進某當退辭甚慷慨不及其私翼日卒年五十七謚曰懿初續不學見輕同列遂力教子弟諸子及孫舉進士者十餘人

南唐書

張訓其先廣陵人祖昇唐末官清流令卒葬滁遂爲清流人勇悍多膽畧時人謂之大口張太祖據合肥訓往見甚歡授親兵已遷黃頭都虞侯擊舒州盜吳迥等知名揚州之役訓潛入城滅餘火得穀數十萬斛以賑饑民明年擊殺甘露鎮使陳可言遂取常州已復屯安吉斷孫儒糧道有功授常州刺史乾盍初駐軍漣水備北師時汴將龐師古屯兵清河口訓率舟師與戰斬師古汴軍駭亂遷淮海都游亦使海州戍將陳漢賓請降訓以漢賓心叵測與戲下王綰等將兵直趣其城漢賓倉

皇出迎訓入其壘高坐漢賓張樂大宴飲酣訓忽拔劍叱曰吾眾已布欲歸卽歸無貽後悔漢賓唯唯解甲聽命轉尚書左僕射拔山都指揮使天復初唐昭宗遣李儼問道封太祖爲吳王得承制封拜訓以功擢司徒未幾王茂章破密州以訓爲密州刺史會茂章爲汴兵所追解兵去諸將請焚城大掠而歸訓不可乃封府庫植旌旗於城上遣羸弱居前自以精兵殿後頃之汴將王檀來遙望見旗幟不敢逼居數日乃敢入遂不復追訓竟全軍還太祖薨訓謝病再徙黃州刺史亦卒贈大傅清河郡公孫原泌登南唐保大中進士累官戶部侍郎

知制誥歸宋歷大理寺卿

十國春秋

續志考正張訓又復見武勳內

高郁廣陵人楚王馬殷爲湖南留後以郁爲謀主署都軍判官初殷畏淮南荆南廣南之強議以金帛結之郁曰莫若上奉天子下撫士民訓卒厲兵以修霸業於是殷始修貢京師開平時郁復勸殷令民得自造茶以通商旅而收其算歲入凡萬萬計命民輸稅者用帛代錢機杼遂繫於吳越殷地大力完得邀封爵以與諸鎮抗者郁謀居多而內外疾郁功者讒郁之短殷子希聲矯令殺郁是日大霧四塞殷怪之吏以狀白殷拊膺大慟

曰老耄使勛舊橫罹寃酷吾亦不久於此矣同上

李貽業吳起居郎李戴子也戴卒官因家廣陵貽業事南唐爲翰林學士李主昇殂大臣欲奉宋后臨朝命中書侍郎孫忌草遺制貽業曰此姦人所爲也大行嘗謂婦人預政亂之本也安肯自爲此若果宣行貽業當對百官裂之於是臨朝之議遂寢李主璟語貽業曰疾風勁草於卿見之保大中以兵部侍郎卒諡曰簡陸游南唐書周宗字君太唐陵人少遭亂孤窮事烈祖爲給使嫻於擯相辭令方時艱難每使四方輒稱職烈祖鎮金陵爲都押衙時用宋齊邱議迎吳讓皇都金陵繕府治爲宮

馬步都虞侯蔡宏業爲宮城營奉使徙都統府於古臺城使都教練使孔昌祚營之都統府成凡二千四百間環一千五百步烈祖已徙居且迎讓皇矣宗請問曰若主上西遷則公當東駕勞費方始怨嗟將日聞矣烈祖納之託以歲不利而止自是宗益預議論齊邱始忌之一曰烈祖臨鏡理白鬚太息曰功業成而吾老矣奈何宗適侍側悟微指乃請如廣陵諷讓皇以禪代事亦請諭齊邱齊邱心忌大議自宗發及其將還留與飲酒而遣騎以手疏切諫烈祖得之大悔懼後數日齊邱馳至金陵爲險語動烈祖請斬宗以謝國人烈祖將從之徐

玠固爭事乃已但黜宗爲池州副使玠李建勳等言天
人之望已集密定大計復召宗還舊職烈祖受禪宗躡
進至內樞使同平章事遷侍中烈祖常召宗及宋齊邱
馬仁裕宴於崇英院歡燕道舊爲他將相莫及然待宗
尤親厚不甚以職務嬰之宗亦能澹然畏遠權勢居家
節儉俸賜皆積不用久之乃罷爲江州節度使徙宣州
節度使入覲賜宴元宗親爲摺襪頭脚以表殊禮復出
留守東都請老以司徒致仕歸金陵俄而宗病卒年七
十餘宋齊邱時以太傅奉朝請撫其棺哭曰君大黜來
亦得時元宗聞之不平宗二女皆爲主后同上

李德誠廣陵人也少事宣州趙鏗爲給使鏗使德誠往
諭進思以城降德誠暴得熱疾委頓不能受命乃使韓
球往進思斬球擲其首於外德誠是夕卽愈鏗死事吳
武王常從征討累遷淮南馬步軍使擒安仁義於潤州
以功拜潤州留後歷撫虔洪三鎮加中書令封南平王
烈祖建齊國德誠率諸將勸進乃其子建勳之謀也昇
元中德誠自洪州入朝烈祖以德誠前代功臣父子皆
參佐命優禮之楊氏將帥德誠最無大功特以姻婭顯
達而名位壽考諸將莫及有子二十人建勳爲相建封
爲將相無阿黨死國事君子善之馬令南唐書

李建勳字致堯南平王德誠之子初德誠守潤州秉燭
夜出候者以聞而徐溫疑其有變徙鎮江州德誠尤不
自安乃遣建勳入謁溫溫見之歎曰有子如是非惡人
也卽以女妻建勳起家爲金陵巡官徐溫卒知詢代鎮
而建勳仍佐幕府及知詢被徵寮屬皆受譴獨建勳自
全烈祖出鎮金陵以爲副使預禪代之計拜中書侍郎
平章事元宗卽位東宮官屬稍稍侵權罷建勳爲撫州
節度使召拜司空乃營亭榭於鐘山適意泉石累表乞
骸骨以司徒致仕賜號鐘山公因爲詩以見志曰桃花
流水須相信不學劉郎去又來建勳博覽經史民情政

體無不詳練惜乎怯而無斷未嘗忤旨故雖有蘊藉而
卒不得行其爲詩少時猶浮靡晚年頗清淡平易見稱
於時保大十年卒臨卒顧謂門人曰吾死斂以布素曠
野深瘞任民耕闢不須封樹暨甲戌之役公卿瑩域越
人發掘殆盡而獨建勳以不知葬所獲免

同上

何敬洙廣陵人軀貌短陋而趨捷有力幼遇亂吳楚州
刺史李簡得之給事左右簡性殘忍僕廝有小過率置
之死敬洙與其伍手博階下有持簡所寶硯過者戲曰
誰敢破此敬洙時被酒厲色曰死生有命乃一擲碎之
翼口簡視事退聞硯毀詰主者具以實對卽命擒至皆

謂必死矣簡妻素奇敬洙匿之堂奧旬日簡謂已逃去亦置不問會有烏逐簡而噪避之輒隨至大怒曰恨何敬洙不此在敬洙善射命中無所遺故思之語未畢敬洙挾朱彈鐵丸拜於前拜起一發斃之簡大喜不復治毀硯事有董紹顏者善相術簡使視諸子曰雖皆善然無及公者獨指敬洙曰此奇相也殆過公簡由是益愛之及長用爲軍校簡卒事烈祖爲裨將進天威軍都虞侯建州之役爲行營招討步軍都指揮使爲查文徽進討敬洙堅謂閩地僻陋不足勞大兵文徽開譬之不得已而行及平建州敬洙功最諸將然以功推王建封無

吝色拜楚州團練使敬洙自以初事李簡於是州尤自感勵常微服游里巷察民疾苦有科條輒先爲經畫民不知勞坐廳事與賓客譚讌民有訴事者立引入親自剖折曲直皆厭服而出保大八年楚馬希萼來附且乞師元宗命敬洙援之遷武昌軍節度使周侵淮南命武安節度使王逵領所部州師入江南境逵奉周詔行且遣部將潘叔嗣爲先鋒取鄂州長山寨殺三千人元宗命敬洙清野入保敬洙格詔出城除地爲戰場曰敵至吾與兵民多死於此大丈夫豈能惴惴閉門自守耶會叔嗣自長山回戈襲朗州逵狼狽而去人重其決加鎮

國將軍中書令後主嗣位以病足乞解官授右衛上將軍芮國公致仕給全俸門第列戟乾德二年二月卒年七十七後主廢朝三日命樞密使中書侍郎朱鞏持節冊贈鄂州大都督左衛上將軍諡威烈同上

馮令頽廣陵人事本郡為軍吏署歙州鹽鐵院判官裨將樊思蘊作亂燒營火及令頽第叛卒皆釋兵救火其得人心如此子延已延魯同上

潘佑廣陵人氣宇孤峻不營貲產文章瞻逸尤敏於議論以秘書省正字直崇文館輔後主於東宮後主即位遷史館修撰改知制誥佑時極論時無所迴避後主手

札敦論之佑七表不止因請休官遠去乃徙佑專知國史悉罷其職時江南衰削佑所上諫疏有陰陰如日將暮之辭後主惡之又其所薦黜與時輩不協因誣以他事劾佑佑自刎母及妻子徙饒州同上

徐鍇字楚金會稽人父延休字德文風度淹雅故唐乾符中進士吳取江西得延休仕至光祿卿江都少尹卒二子鉉鍇遂家廣陵鍇四歲而孤母方教鉉就學未暇及鍇簡自能知書稍長文詞與鉉齊名昇元中議者以文人浮薄多用經義法律取士鍇耻之杜門不求仕進鉉與常夢錫同直門下省出鍇文示之夢錫賞愛不已

薦於烈祖未及用而烈祖殂元宗嗣位起家秘書郎授
右拾遺集賢殿直學士論馮延魯有罪無才人望至淺
不當爲巡撫使重忤權要以秘書郎分司東都然元宗
愛其才復召爲虞部員外郎後主立遷屯田郎中知制
誥集賢殿學士改官名拜右內史舍人賜金紫宿直光
政殿兼兵吏部選事與見鉉俱在近侍號二徐初錯久
次當遷中書舍人遊簡言當國每抑之錯乃詣簡言簡
言從容曰以君才地何止一中書舍人然伯仲竝居清
要亦物忌太盛不若少遲之錯頗怏怏簡言徐出妓佐
酒所歌詞皆錯所爲錯大喜乃起謝曰丞相所言乃錯

意也歸以告鉉鉉歎息曰汝癡絕乃爲數闕歌換中書
舍人乎錯凡四知貢舉號得人後主哀所製文命爲之
序士以爲榮錯酷嗜讀書隆寒烈暑未嘗少輟後主嘗
得周載齊職儀江東初無此書人無知音者以訪錯一
一條對無所遺亡其博記如此江南藏書之盛爲天下
冠錯力居多李穆來使見錯及鉉歎曰二陸之流也時
國勢日削錯憂憤鬱鬱得疾謂家人曰吾今乃免爲俘
虜矣開寶七年七月卒年五十五贈禮部侍郎謚曰文
著說文通釋方輿記古今國典賦苑歲時廣記及他文
章凡數百卷錯卒逾年江南見討比國破其遺文多散

逸者 陸游南唐書

宋徐鉉字鼎臣開寶末王師圍金陵後主命朱令賢盡括江西土客義師一十五萬作巨筏沿江而下以援金陵未至而圍益急後主選近臣入朝且求緩師鉉請行後主曰卿之行也當止上江救兵勿令東下鉉曰今社稷所賴惟此救兵何可輒止後主曰既以和解為名而復徵兵入援自成矛盾於汝豈不危乎鉉曰臣此行未必能紓國難但置之度外爾後主泣下授鉉左僕射參知左右內史事鉉固辭乃以隱士周惟簡假給事中為鉉副鉉等至京師對於便殿鉉懇述江南事大之禮甚

恭且無王祭不共之罪徒以被病未任朝謁非敢拒詔乞緩兵以全一邦之命其言甚切太宗皇帝與語反覆數四鉉辭氣愈壯曰李煜無罪陛下出師無名太祖大怒請畢其說鉉曰煜効貢賦二十餘年以小事大如子事父未有過失奈何見伐太祖曰爾謂父子者為兩家可乎鉉等無以對而退後仕皇朝與湯悅同奉敕撰江南錄至於李氏亡國之際不言其君之過但以歷數存亡論之君子有取焉 馬令南唐書

按錯應列鉉之次乃錯始終南唐未嘗入宋鉉則從主歸命為宋名賢朝代攸分非倒置

也

潘及甫字憲臣江都人博通經史厲志文行聞胡瑗倡學於湖州往從之瑗見其文喜曰非諸生比也遂補學職妻以女弟慶歷中與兄希甫同登進士爲懷仁尉筠州判官及知分甯霍邱壽春三縣所至咸著政績遷秘書丞充楚王宮大學教授律宗室以禮法神宗嘉之後以屯田員外郎通判江州遷左朝散郎親族之貧寡孤幼者皆撫卹之晚病目每命子姪執策雜誦終日傾聽將卒猶令讀周書漢史口占詩歿

嘉靖靖維揚志

仲簡揚州人少習明經以貧傭書楊大年門下大年見

而奇之曰子當進士及第官至清顯乃教以詩賦簡天禧中舉進士第一甲及第官至天章閣待制卒

歸田錄

孫長卿字次公揚州人以外祖朱巽任爲校書郎知楚州糧料院郡倉積米陳腐爲酌新舊均之通判河南秋大雨軍營壞訛言洛兵叛城中謹然長卿馳往諭推造言一人誅之眾始定詔汰三陵奉先卒羣譟府下長卿具言不可朝廷爲止改知和州有富民殺其弟反誣他人謀害鞫問服罪郡人神明之累擢江浙荆淮發運使歲漕米至八百萬時將弛茶禁收其征召長卿議條上不便十五事不從改陝西都轉運使踰年知慶州城據

險無水長卿爲鑿百井皆及泉況陽有羅川嶺上構危
棧下臨不測之淵過者惴恐因訪得唐故道闢爲通塗
行旅便之加集賢院學士移知河東拜龍圖閣直學士
知定州有園利八十萬悉歸之公適熙寧初地震城郭
倉庾皆潰以其資盡力繕補神宗佳其能轉兵部侍郎
留再任卒年六十六長卿性潔廉無文學而長於政事

宋史本傳

增修甘泉縣志卷十二

甘泉縣知縣吳鄂峙

張宏運

王熙泰

原纂

陳觀國

揚州府教授李保泰續輯

徐成敷

桂正華

增訂

人物志下

王令字逢原廣陵人年十數歲晝從羣兒嬉夜獨誦書
往往達旦未嘗從師爲辭章卽雄偉老成人見之皆驚
年稍長僮不羈束周鄉里之急爲不義者面加毀折
里人滿執中以令所爲爲非是令因自悔更閉門讀書
久之所得益以閱深家貧乃聚徒天長時王安石赴召

道由淮南見令大喜期其材可與共功業因其姨妻
之部使者以其節行聞於朝不報嘗作論語義示安石
安石答云言微旨奧直造孔庭又爲題孟子講義及與
之書謂足下衣冠履缺坐而語未嘗及已之窮終歲食
不輟不以銖忽妄售於世人之自立如足下者有幾令
後徙江南居於常州卒年二十八有廣陵集十卷蒙求

一卷 臨川集

續志考正王令又複見隱逸內

張象中江都人有學識與子宗彝宗古聯名中第宋宣
獻公以詩贈之曰棘闈舊價喧龍首花塔新題續雁行

當時榮之後象中直集賢院宗古集賢校理

嘉靖維揚志

孫錫字昌齡江都人天聖二年進士授巢縣主簿改鎮
江軍節度使推官知仁和縣撫下仁恕以父喪去三年
舉充國子監直講改著作佐郎遷開封府推官隨尹泰
開封當改者數事上然之道士趙清貺出入宰相龐籍
家受賄下府勘實坐杖配沙門島行兩日死御史劾府
希宰相旨故杖殺清貺以滅口仁宗疑之悉罷知府推
判官以錫知太平州然清貺事獨判官王礪所決錫不
自辯未幾仁宗悟非其罪復以錫提點淮南路刑獄治
淮南二年活大辟十三人考課爲天下第一召爲三司

戶部判官求知宣州許之召五縣令約以州所下書有不便封還尋知舒州發常平廣惠倉以活陳許汝穎蔡流人及歸計口量遠近給食遣之去者率錢買香焚於府門比代去州人闔城門留之官至尙書度支郎中以老致仕神宗卽位遷司封賜金紫卒年七十八有文集

二十卷

萬曆府志

張方平字安道先宋人徙揚州少英秀年十三歲母撫之曰揚州俗浮薄睢陽鄉里有庠序吾弟爲之領袖盍往依之割情以遣旣至就舅氏學業大進舉茂材異等又中賢良方正遷著作佐郎通判睦州當召試館職命

直集賢院俄知諫院夏人寇邊方平首乞合樞密之職於中書以通謀議帝然之遂以宰相兼樞密使西師久未解方平言願因郊赦開其自新之路帝喜改慶曆赦元昊竟降旣使契丹還知制誥權知開封府府事叢集方平獨默記決遣無少差忘拜御史中丞判太常寺以侍讀學士知益州或煽言儂智高在南詔將入寇攝守亟調兵築城民大驚擾朝廷發陝西步騎往戍蜀詔趣方平行方平曰此必妄也道遇戍卒皆遣歸他役盡罷上元張燈城門三夕不閉得印部始造此語者梟首境上而流其餘黨蜀人遂安嘗畫上十四策富弼讀其奏

漏盡十刻帝稱善弼曰此國計大本非常奏也悉如其說行之英宗時遷禮部尙書爲學士承旨帝不豫召至福宣殿帝憑几言言不可辨方平進筆請乃書云明日降詔立皇太子方平抗聲曰必穎王也嫡長而賢請書其名帝力疾書之乃退草制神宗時王安石行新法方平極論其害帝聞撫然哲宗立加太子太保薨年八十五贈司空謚文定

參宋史行狀

呂溱字濟叔揚州人進士第一通判亳州直集賢院同修起居注坐預進奏院宴飲出知蘄楚舒三州復修起居注儂智高寇嶺南詔奏邸毋得輒報溱言一方有警

使諸道聞之共得爲備今欲人不知此何意也進知制誥又出知杭州入爲翰林學士疏論宰相陳執中姦邪仁宗還其疏溱曰以口舌論人是陰中大臣也願出以示執中使得自辨未幾執中去溱亦以侍讀學士知徐州賜宴資善堂遣使諭曰此特爲卿設宜盡醉也詔自今出經筵出者視爲例徙成德軍時方開六塔河宰相主其議會地震溱請罷之以答天戒溱精識過人辨訟立斷豪惡斂蹟嘗以職事對神宗察其有疾色勉以近醫藥已而果病改樞密直學士提舉醴泉觀遂卒年五十五贈禮部侍郎帝悼念之詔中書曰溱立朝最孤知

事君之節絕蹟權貴故中廢十餘年人無言者方擢領
要劇而奄忽淪亡家貧子幼遭此大禍必至狼狽宜優
給贖禮官庀其葬以厲臣節敕其婦兄護喪歸溱開敏
善議論一時名輩皆推許然自貴重在杭州接賓客不
過數語時目爲七字舍人云

宋史本傳

續志考正溱父士元見前羅願新安志作歛人云
游學在外者卽貫其籍以試如呂溱以揚州是也
張康國字賓老揚州人登元豐進士第知雍邱紹縣聖
中提舉兩浙常平徙福建轉運判官崇寧元年入爲吏
部左司員外郎二年爲中書舍人徽宗知其工詞章不

試而命遷翰林學士知制誥三年進承旨拜尙書左丞
以其兄康伯代爲學士尋知密樞院事是時西北邊帥
多取部內官自辟置康國曰塞吏當擇人奈何欲私所
厚善乎乃隨闕選用著爲令上嘗欲擢用張邦昌康國
對曰邦昌貌復而心狠不可任金人數侵中國邦昌請
修子姪禮康國力拒之卒贈開府儀同三司謚文簡

萬歷

江都縣志

孫洙字巨源錫之子羈卯能文未冠擢進士包拯歐陽
修吳奎舉應制科進策五十篇指陳政體明白剴切韓
琦讀之太息曰今之賈誼也再遷集賢校理知太常禮

院治平中求言洙疏時弊要務十七事後多施行兼史館檢討同知諫院乞增諫員以廣言路王安石主新法多逐諫官御史洙乃力求補外得知海州免役法行常平使者欲加歛緡錢以取贏爲功洙力爭之方春旱發運使調民濬漕渠以通鹽河洙持之不下三上奏乞止其役旱蝗禱胸山徹奠大雨蝗赴海死尋幹當三班院三班員功罪籍不明吏爲姦欺洙革其甚者八事定爲令同修起居注進知制誥洙言遷敘不宜用一定之詞詔自今封贈蔭補每大禮一易他皆隨等撰定元豐初兼直學士院澶州河平詔作靈津廟碑神宗獎其文擢

翰林學士纔踰月得疾時叅知政事闕帝將用之數遣中使尙醫勞問竟卒年四十九帝臨朝嗟惜常賻外賜錢五十萬洙博聞強識明練典故雖對親狎者未嘗發一鄙語文詞典麗有西漢之風士大夫共以丞輔期之不幸早世一時憫傷焉

宋史

楊處厚字純甫江都人以父閎恩補齋郎加校書郎不受召爲婺州浦江尉均平徭役邑人悅服爲永康錄事叅軍同官皆武人處厚善於協恭兵民之政無不關預守者賴以治卒於官

萬曆縣志

王幾字彥成江都人知舒城未赴丁父憂王安石知其

才選宰長洲縣縣號雜治幾弛張以時豪強懾服歲饑廣為賑救民無轉徙權勢者欲侵撓之執法不回治聲聞京師仕至大理寺丞同上

孫馨字叔靜錢塘人父直言徙揚之江都馨年十五游太學蘇洵滕甫稱之調越州司法叅軍守趙抃薦其材知偃師縣韓縝鎮長安辟入府召對擢提舉廣東常平徽宗初徙兩浙由福建轉運判官召為屯田員外初馨與蔡京善常言京才勝德恐貽天下變至是京還朝遇諸塗逆謂曰我若用於天子願助我馨曰公誠能謹守祖宗之法以正論輔人主示節儉以先百吏而絕口不

言兵天下幸甚馨何為者京默然既出提點江東刑獄未幾入為少府少監戶部郎中時縣官用度無藝馨與尚書共疏論之當國者不樂徙馨開封遷太僕卿殿中少監四輔建以顯謨閣侍制知曹州論經始規畫之勞轉大中大夫徙鄆州尋罷提舉鴻慶宮起知單州遂致仕靖康二年卒年八十六贈銀青光祿大夫諡曰通靖薨篤於行義在廣東時蘇軾謫居惠州極意與周旋二子娶晁補之黃庭堅女黨事起家人危懼馨一無所顧時人稱之宋史

莊徽字彥猷江都人政和初除兩浙運副二年召還歷

徽猷閣待制知平江府時朱勔被罷中貴緣勔而使
者冠蓋相望官吏無不傾身事之徽獨不假借朝廷命官
造乘輿服御於浙西特令徽與勔協理尋詔罷勔尙遷
延觀望徽曰此天子德盛事大臣亟當承奉何顧其他
卽日罷之在官六年乞閒不允久之提舉洞霄宮卒應

府志

李正民揚州人登政和二年進士第中詞學兼茂科累
遷禮部郎官建炎二年除校書郎累遷中書舍人俄出
爲兩浙江西湖南撫諭使正民請依法具奏官吏能否
其民間事於州縣實負冤抑者並聽陳訴卽爲伸理從

之以奉使稱職除給事中吏部侍郎正民辭不拜上特
賜詔使就職紹興十三年正民奏宣和以前通令佐並
帶主管學事軍興以來學校之教中輟今宜依舊給銜
以示聖朝優武修文之意爲江西路提點刑獄仕至左
朝散大夫充徽猷閣待制平原縣開國伯卒嘉靖維揚志

王昂揚州人少以文學知名政和八年廷策進士嘉王
楷第一上不欲以王子魁多士擢昂置榜首除秘書省
校書郎宣和元年昂言今後除卿監未經上殿者乞令
如郎官之法並令闔閭引見從之高宗卽位除尙書工
部員外郎遷起居舍人秘書少監時御府頒降書籍四

百九十二種曾皎家藏書二千六百餘卷昂請分爲經史子集四庫委官校讐其脫落譌舛者以別本參考補寫畢則繳進除徽猷閣待制知台州尋奉祠江州卒於家

同上

王居正字剛中揚州人少嗜學工文辭入太學不肯習新經字說不第十餘年後司業王齊同知貢舉得其文欲擢爲首以風多士他考官持之置次選避寇陽羨山中以范宗尹薦召宗尹謂曰時危如此公不極所學拔元元塗炭中尙誰待耶入對奏上嘉其說除太常博士遷禮部員外郎建議合祭天地於明堂奉太祖太宗配

從之撫州守高衛獻甘露圖居正言今日恐非天降祥瑞之時請却其圖尋遷起居郎次前世聽納事爲集諫十五卷疏時務數千言論省費尤切居正與秦檜素善初檜論天下甚銳旣相所言皆不酬居正因而面秦檜嘗語臣中國人惟當着衣噉飯共圖中興臣心服其言今爲相施設止是願陛下以臣所言問檜檜銜之后屏居括蒼帝諭其弟駕部郎居修曰卿兄今安在行大用矣起知温州自知非出檜意必不爲所容以目疾請祠凡十年檜死復故職卒年六十五居正儀觀豐偉聲音洪暢俸祿班兄弟宗族無留者郊祀恩以任弟居厚其學

增修甘泉縣志卷之十一
根據六經始楊時著三經義辨示居正曰吾舉其端子
成吾志遂刻屬十年成書辯學十三卷詩辨學十二卷
周禮辨學五卷又外集一卷盡哀安石與雩言之畔於
道者四十二篇名曰辨學上之因言陛下惡安石之學
灼見其弊安在上曰安石學雜商韓今日之禍人徒知
罪蔡京王黼而不知由於安石居正曰安石得罪萬世
不止於此因陳其釋經無父無君者若干條帝作色曰
是大害名教孟子所距邪說正謂是矣退乃序帝語繫
於首簡居正書既行而揚時三經義辨亦列秘府於是
天下不復言王氏學

安簡錄

史正志字志道江都人紹興二十一年進士授歙縣尉
秩滿詣闕上保治要畧八篇丞相陳康伯薦於朝除樞
密院編修乞築和州城及舒揚防守荆襄事宜高宗視
師江上命扈從至鎮江又上恢復要覽五篇且指張浚
之失至建康又言三國六朝形勢與今日不同要當無
事則都錢塘有事則幸建康以爲東西都詔下侍從臺
諫集議從之尋除司農寺丞孝宗卽位除度支員外郎
後因論左帑南庫西庫窠名差互忤時相以散官謫永
州尋復原官除右文殿修撰知靜江府未赴而罷賜爵
文安縣開國男轉朝議大夫後歸老姑蘇號吳門老圃

李易字順之揚州人好學多聞以清素見稱建炎初高宗駐蹕維揚策試進士易爲第一以上憂勞辭聞喜宴從之授僉書江陰軍判官會金人至夏港距城數里守臣胡紉謂易曰吾曹當死城郭君有母宜急避之易歸告其母蔣氏母曰我去則汝必無意監守死生當與汝同之由是易守益固金人亦引去紹興元年爲太常博士韓世忠辟易參謀轉工部員外郎爲太常寺少卿自建炎維揚之變宗政寺所掌圖牒皆逸於江滸至是易請編次玉牒從之遷中書舍人改直秘閣知揚州易以

本貫辭不許官至敷文閣待制隨奉祠卒於秀州

萬縣志府志

李衡字彥平江都人高祖昭素仕至侍御史衡自幼博通羣書爲文操筆立就宣和間入辟雍有洛人趙孝孫與同舍其父實師程頤家學有源勸衡讀論語曰學所以爲聖賢非記誦詞章之習立心不可有絲毫虛偏惟誠實自處方可以言衡心佩其訓學必以論語爲根本登進士授吳江主簿部使者怙勢作威侵刻下民衡不忍迎合投劾歸後知漂陽專以誠意化民民敬愛之夏秋二稅榜期日縣門辦先他邑鄉無吏迹歷四年未嘗擊一獄囚府帥汪澈轉運韓元吉列上治狀詔進一秩

尋召爲監察御史憲司封郎中密院檢詳出知婺州加直秘閣引年除秘閣修撰致仕孝宗思其樸忠起除侍御史命同知貢舉與右正言王希呂力疏張說不當以母后肺腑除節度使掌兵柄廷爭移時改起居郎嘆曰與其進而負於君孰若退而合於道請老愈力仍以秘閣修撰致仕與希呂同時去國時莫濟不書敕周必大不草制士爲四賢詩以紀之後定居崑山結茅別墅杖履徜徉聚書萬卷號曰樂菴臨歿沐浴冠櫛儵然而逝

年七十九

宏簡錄

牛大年字隆叟揚州人登慶元進士累官將作監簿次

對言今日士氣久靡亟宜振起必上有扶持作興之意而後縉紳無貪名嗜利之習遷軍器監簿大宗正丞四川提舉茶馬兼權總領黎州管內安撫司公事節制黎雅屯戍諸軍加直寶章閣工部員外郎上疏請懲貪吏遷左司郎中進直華文閣浙東提點刑獄入守秘書少監宗正少卿歷秘書監起居舍人起居郎兼崇政殿說書以寶章閣待制提舉太平興國宮卒特贈四官大年清操凜然所至以廉潔自將

宏簡錄

李直養字無害正民之孫也紹熙元年以薦攝華亭令是年夏久旱直養精禱遂獲大雨三日畝澮沾足秋旱

再禱又應歲用大稔二年丞平湖以當路薦遂命爲令
邑境沿海多有溺屍乘潮以上暴露沙際直養置塚塋
瘞之未踰年凡瘞百五十餘人又知海鹽縣修建學校
作小學定爲章程擇教諭朱沆爲之師由是里巷絃誦
洋洋盈耳風俗丕變民爲立志去思碑

嘉靖維揚志

田克悉字安叔江都人學問該博爲鄉里所推嘉定元
年登進士任松溪主簿秩滿試博學宏詞科崔與之帥
揚甚敬禮之及鎮蜀辟置幕府資其贊畫後知沔州在
任決疑獄抑僥倖節浮費政績茂著民甚愛之

萬應揚州府志

元彭好古字德明江都人泰定二年尹崇安縣每朔望

及上下旬暇日輒率邑儒與吏詣學講解經史立惠民
局新廣福橋多所建立

嘉靖維揚志

曲出江都人爲邵武達魯花赤儉樸寬仁清心寡欲爲
政不擾僚屬化之汀寇犯境賴出保捍郡以無事

同上

維揚秦君昭妙年游京師其執友鄧載酒祖饑旣而昇
一殊色小鬟至前令拜秦因指之曰此吾爲部主事某
人所買妾也幸君便航可以附達秦弗敢諾鄧作色曰
縱君自得之亦不過二千五百緡耳何峻辭乃爾秦勉
強從命迤邐至臨清天漸暄夜多蟲蚋可畏內之帳中
同寢直抵都下置舍館主婦處持書往見主事問曰足

下與家眷來耶曰無有主事意極不悅隨以小車取歸
踰三日謁謝曰足下長者也昨已作答簡附便驛報吾
鄧公且使知足下果能不孤公付託之意矣遂相與痛
飲盡歡而散後秦之子孫咸至顯宦

輟耕錄

續志考正秦昭又複見篤行內

明邱民字克莊江都人洪武初爲松江府學訓導殷孝
奎集有蹋雪入坂城訪邱克莊卽中詩顧祿謹中曰余
年十五游郡庠當時爲師者全公希賢邱公克莊楊公
孟載貝公仲琚魯公道源包公叔蘊皆一時名士由是
慕學之士自遠而來十餘年無慮千數松江一時文風

之盛不下鄒魯

列朝詩集小傳

陳談字公信江都人洪武間貢入太學授監察御史巡
按雲南每出解見東家烟突出人手作招訴狀心知其
有寃猝召其家督錮之而搜檢其家物得江西估客路
引一紙乃出訊之曰爾前者沒估客財而殺之匿其屍
竈下今露矣其人卽伏罪時詫其神厯陝西左布政使
多惠政以忤藩邸歸

萬曆縣志

張曦字景芳江都人景泰間以例貢授攸縣令民素強
梗曦躬行化導之門禁清肅戒絕餽納昭雪幽枉寬其
徭役不事苛暴民遂感服乞歸數年民爲立生祠祀之

嘉靖維揚志

馬岱字伯瞻江都人成化丙戌進士初任戶曹會計出入人莫敢欺後知泉州府泉民有數世不葬其親者岱至諭以禮旬月葬以千計僧以尼爲下院岱罪其尤者餘比以配平民識者服其重風化內艱解任行李蕭然性剛峭好面折人過不避權貴人憚而怨之然守正嫉邪論者謂亦今之矜也

嘉靖維揚志

邵旻字天民江都人弱冠成進士授大理評事與同僚謁孝陵讀所豎碑一過成誦人羣異之不知其誦碑時又目他碑亦能成誦舉以語同僚試之良然人人駭服

以爲不可及居官嚴肅時巨璫貴戚俱身行賄賂撓阻法律旻雖孱書生堅持三尺曰吾官可舍吾法不可犯也爰書奏讞矢示天日孤立行意謝一切交知豪強之請遂坐忤權璫落職建康幕臨行有贈以詩曰小官難執法直道不容身蓋實錄也與同榜進士賈恭靖耿清惠鄧襄敏最稱莫逆然彼俱致位大僚而旻獨偃蹇無憾也後築室邗溝杜戶擁書栽花種樹而已

石五詒齋集

續志考正邵旻舊志通州人前志選本鄉科中俱

不載誤出一傳

俞攻字崇治江都人生而孝執親之喪哀毀盡禮處兄

弟間怡怡如也周貧振弱不以自德歲凶道殣多置棺以殮之嘗夢一髯丈人語之曰汝當有兩大厄以汝有陰德不汝厄也正統甲戌偕仲兄教之子渡江夜泊大儀津忽羣盜擊舟君驚入水大呼曰能盡取吾財毋害吾幼姪波濤中若有掖之者使得近舟盜異之遂遁去明年胸發疽醫俱爲不可瘳復夢有語之曰二個人能辦此果得竺姓愈年五十一卒於家

崔東洲文集

馬駢字共甫江都諸生泉州守岱之子與兄駢次甫駢用甫並有詩名駢著紫泉集二十卷共甫撰有春秋探微十四卷詩頗去陳言

明錄詩

按三人俱係前志失編事蹟昭然所以增載續志考正馬駢字次甫與弟駢用甫正德癸酉同榜舉人駢官武陟知縣俱在選舉內幼弟駢共甫亦有詩名嘉靖志欲稱駢能文不爲作傳有紫泉集二十卷集今亡明文範錄選五首又傳法海寺橋記皆非率爾可到者駢春秋探微十四卷其目見經義考而不傳駢又有江都十老傳一卷已見經籍目內前志以爲三人俱係失編者非虛學士交昭以春秋探微補入遼金元藝文志者亦未審明詩綜以詩爲主列弟駢于先而附及兩兄以附

與馴無詩可錄也時北地之學方興揚州宗子相
朱凌谿相應和駙雖在同郡縉于乙科卑宦未必
折輩行與交遂鮮稱道及之而其集浸徵至今宜
鮮知者

張冕字汝端江都人由舉人同知台州府其俸外一蔬
不擾於民衙署清肅苴謁無敢入考滿增四品俸復任
五年比歸家人誤持官釜入舟至中途始覺急還之遷
澂江知府捺履益峻後家居運使畢亨知其貧以金遺
之固辭不受

嘉靖維揚志

高銓江都人成化己丑進士爲河南按察使風紀整肅

陞左布政使治行異等以左副都御史巡撫保定有奸
民獻民田爲皇莊者侍郎許進奉命會勘冤聲撼昭至
毆州縣吏不得行進遽欲以小民冤狀問銓曰此固爲
民至意萬一不測如重民罪何請第勘實聞上雅愛民
必不忍奪其生奏上果然正德中爲南戶部尙書忤劉
瑾致仕逮獄瑾誅復官銓精通律令自謂治律之功不
減治經史推挽名下後進不遺餘力

名山藏

盧瀚字文淵江都人宏治癸丑進士授兗州府推官政
擦敏肅洗冤澤物他郡獄多待決累斷大獄有異政郡
人祠祀焉行取爲南道御史首論周經許進當從眾薦

乞速召用文森等因論事下獄宜爲寬宥其邪佞如陳
璠李溫俱可斥免雜進如孫伯謙等亦乞罷遣又因災
異力請開訥讜言以祛敝政及清冗食用省京儲凡所
論列並切大體遷知岳州府以疾乞歸吏部覆勸瀚公
勤清慎愷悌慈祥題准令其回籍養病俟痊日起用尋
卒

同上

金琇江都人成化丁酉舉人正德初知保康縣廉介正
直吏民不敢欺時歲稔兵擾民將竄去乃推誠撫安之
民始樂業尤加意學校待士以禮文風漸興去官後民
祀祠之

同上

趙鶴字叔鳴江都人宏治丙辰進士授戶部主事爲尙
書侶鍾所知壬戌天下大稔鶴代草上寬恤事宜詔文
武大臣會議蠲諸不急著爲例陞本部郎中督永平山
海薊州糧草兼視屯田條上邊場急務十六事又以徵
收豆草積久腐敗奏請折價存庫臨時和糴以給軍需
其古北等口倉儲不足以供遊兵請更番操練有警調
發自是邊儲賴焉正德初陞建昌知府益州軍校有恣
橫虐民者捕置之法所治肅然閹瑾以規賂不得搜薊
州耗糧事左遷南安同知尋擢金華知府在郡疏請廣
折徵寬加派備蓄積禁溺女諸事錄東萊北山魯齋仁

山白雲五先生遺書爲正學編集范香溪以下諸家爲
金華文統集劉孝標駱賓王舒元興及近世四十餘人
爲文統拾遺表范文簡潘默存之里皆正俗誠民之安
擢山東提學副使或以其約士過嚴爲蜚語謗之卽上
疏乞致仕歸築精舍江濳日夕嘯咏其中嘗編維揚郡
乘著具區文集若干卷

廣陵十先生傳

徐昂字文舉江都人宏治丙辰進士授兵科給事中屢
疏陳治道及論邊備皆切中時務正德初劉瑾引用其
黨馬永成谷大用等八人戶部尙書韓文抗疏暴瑾罪
惡瑾矯旨罷文昂疏言文歷官年久端謹素著國家倚

以爲重不宜罷瑾矯旨并奪昂官嘉靖初卹錄舊臣起
昂爲廣東右叅議昂初無子就王生相生曰君今年登
第但不宜子後在西安途中買一妾詢之乃良家子卽
焚券爲擇配秩滿如京師相者迎謂曰君相頗異可得
子矣後數歲果育五子

康熙府志

左唐字堯卿江都人宏治丙辰進士爲廣東參政署司
篆吏無所容奸恨欲撓之會查盤使者至所盤計鉅萬
獨羨餘百金訝其少詰守藏者皆曰事由署印叅政使
者弗審徑以論唐唐忿而病僚友慰之拊膺曰平生砥
礪名節顧乃蒙垢若此遂不食而死同寅並藩臬會呈

撫按言唐寃巡按爲覆盤庫則應有羨餘故在實不止
百金將奏雪之以唐喪歸乃止唐性廉介以官爲家不
問生產比喪歸囊橐蕭然倫以訓爲誌墓直書其寃

維揚志

葉相字良臣江都人宏治壬戌進士初司理金華平獄
均賦郡民戴之入爲給事中時劉瑾擅政中外無敢言
相首疏劾瑾又上建儲及漕運庫藏等十餘疏皆剴切
識治體因忤仇鸞出叅政貴州歷江西布政使已復擢
貴州巡撫會芒部構亂相討平之賜鏹帑擢戶侍部郎
尋以病予告久之起補刑部侍郎終三年不調或諷以

賂主簿者相笑曰有納粟尙書耶予告歸築迂隱園
以老卒賜葬祭贈右副都御史祠鄉賢子曉以廕授南

京中府都事

康熙府志

盛儀字德璋江都人宏治乙丑進士觀吏部政時劉瑾
以事干尙書托儀致書儀拒不許以是知名授禮部主
事改監察御史時文體日靡儀請崇濂洛之學以挽士
習陞山東按察副使勦商河巨盜寬夫役之困東人戴
之遷雲南叅政察屯務清宿蠹尋陞湖廣按察使督修
顯陵多所節省又活饑民萬計入爲太僕寺卿立解馬
法遂著爲令儀歷官以清峻著名及致仕歸橐無餘費

薄田敝廬僅足自給尤篤於孝友兄弟終身同居卒祀鄉賢所著有維揚志二十卷儀初學於章懋鄉人咸推其學術純正無悖於程朱云同上

高澆字穎銓之子也宏治乙丑進士正德初劉瑾羅織大臣誣逮銓下詔獄澆伏闕請以身代疏詞迫切事得雪宸濠謀逆陰賂璫請添設護衛澆抗疏陳祖宗法無增設藩王護衛例不可許且發其不軌事事遂寢後宸濠反人服其先識焉時大臣出治張秋決河又討江西流賊久無功澆并疏治河討賊之畧仕至南京光祿寺少卿同上

王儼字士望江都人宏治乙丑進士知光澤縣以廉謹稱擢南京刑部主事人不可干以私有權要子殺人論之如法陞郎中執掾愈嚴出守岳州以直道不容歸鄉人重之同上

王軌江都人宏治十二年進士正德初歷工部員外郎屢遷山東左布政使嘉靖初入為順天府尹房山地震軌言召灾有由語多指斥忤旨切責尋遷右副都御史巡撫四川芒部土知府隴慰死庶子政與嫡子壽爭立朝議立壽政怒使人誘殺壽奪其印軌乃會貴州兵擒政於水西璽書獎勞為戶部右侍郎覈九九首舊地以

餘地歸之民勘御馬監草場釐地二萬餘頃募民以佃
房山民以牧馬地獻中官韋恒軌釐歸之官奸人馮賢
等復獻中官李秀秀為請於帝軌抗疏劾之竟治賢等
如律覈勦莊田請如周制計品秩別親疎以定多寡非
詔賜而隱占者俱追斷戶部尚書梁材採其言兼并者
悉歸官稍進左侍郎罷歸以兵部尚書李承勛薦起故
官總督倉場再遷南京戶部尚書改兵部詔舉將材薦
鄭卿沈希儀等二十一人皆擢用以老乞罷卒廣陵十先生傳
陳達字兼善揚州衛人授威遠令銓部舉天下廉吏七
人達居其一後以病歸民立去思碑頌之康熙府志

顧溥鎮遠侯成元孫也年十三嗣侯與諸小侯入國學
用薦掌五軍右掖宏治二年拜平蠻將軍鎮湖廣桑植
安撫司土官殘虐溥捕首惡斬之五年冬貴州都勻蠻
七富架作亂梗滇蜀道詔溥充行軍總兵官率兵八萬
討之分五路刻期並進誘誅富架父子斬首萬計加太
子太保增祿二百石入提督團營兼三千營掌前軍都
督府事十八年卒謚襄恪溥清慎守法卒之日囊無餘
貲英國公張懋出布帛以殮橫雲山人史稟

續志考正復見武勳內

陳言字汝行江都人正德丁卯領鄉薦授棗強令治稱

廉明有權璫欲造橋衡水令棗強助費巨萬言執不可

罷其役邑旱徒跣以禱俄雷雨大作邑以大稔考滿遷

處州通判棗強士民遮道泣留建祠以祀

康熙府志

俞敦字崇禮江都人正德辛未進士改庶吉士授刑科

給事中敦在諫垣首劾遼蜀撫臣及諸藩守臣不職者

時江彬潛圖不軌朝臣無敢言敦獨疏陳其逆狀不報

戊寅命勘河南總兵張璽等不法事敦執法按罪踰月

獄成眾咸服焉一時權倖如錢甯輩憚敦名求與納交

皆峻拒之遷禮科右給事中世宗卽位敦首疏四事一

曰去壅蔽二曰親儒臣三曰立綱紀四曰惜名器後奉

詔使安南賜麒麟服進都給事中出知廣西梧州府病

卒同上

徐晉字文明江都人正德辛未進士歷任南京兵部車

駕郎中大璫劉瑯怙勢晉繩之以法宸濠叛南都震恐

大司馬喬宇謂晉曰吾視僚屬惟君才可任宜努力悉

以軍事委之晉選將調士修脩器械增置船艘晝夜不

怠及上駐蹕南都供億旁午晉從容取辨有言宜賂江

彬者不聽人為晉危而卒無患陞青州知府以勞致疾

易簀時同官憫其貧請納公銀若干晉峻拒不受且曰

吾恨不能如前輩馬伯瞻清風高節敢至死變其守乎

同上

樓觀字國光江都人正德丁丑進士授刑部主事陞員外郎中出守興化政尚寬惠吏無敢爲奸仙遊苦海寇爲擾觀鑿石築城民賴以安每行縣自庀厨傳不擾下邑陞湖廣副使致仕橐中惟載圖書數卷而已觀之先出嗣葉氏至子懋中嘉靖壬戌成進士官刑部主事始疏復樓姓同上

續志考正樓觀子懋中嘉靖壬戌進士選舉作隆慶戊辰

高遷字升之銓從子正德辛巳進士授甯波府推官攝

郡事會日本貢使搆亂遷討平之陞戶部主事員外郎督糧通州值邊警歲漕四百萬石無缺陞郎中尋知順德府時車駕幸承天道出順德遷抵任甫及旬區畫供帳無不立辦城沙河工竣陞河南按察司副使會河決睢州野鷄岡奉敕治之遷爲鑿孫繼口塞河二百二十五里以疏橫流復扈運口九十里上遣兵部侍郎干以旂視其役薦遷勞績第一明年益發民濬三河未深者漕運賴之詔增俸一級百姓肖像祀焉所著有南兗州集順德府志同上

李樹敏江都人以選貢授嘉善丞修築海隄著有勞績

再補安福丞時值均田敏自具食具出入阡陌不以煩民除夕有餽豚蹄者家人受之業就鼎矣令挈以還之其清介類此卒於官士民皆垂涕祀之名宦同上

郝理北京錦衣衛籍生十齡而孤家故貧既而貧益甚有從父梁賈揚州富巨萬理往依之正德末年中貴擅權諸大賈逮詔獄梁亦在逮中諸大賈相顧愕貽謂往當論死矣理挺然請身代梁往既對簿申寃狀反覆數千言不少紕刑曹爲白其事竟得赦梁名并諸大賈賈因梁咸奉金願交歡理理却之再進再却初理歸梁梁以凡兒子畜之至是始重理理遂移家於揚梁卒理嗣

其業又十年其富十倍於梁焉理性好結納饋遺諸父執歲不虛遇貧乏之士尤時時周贍之子莘登嘉靖丁未進士仕至湖廣布政使叅議理以子貴封奉直大夫

萬曆志

續志考正郝理復見篤行內子莘嘉靖丁未進士選舉作成性則莘當其舊名前志于理傳作莘選舉作成性並未畫一

李應暘字子新江都人以歲薦授臨邑訓導遷龍游再轉懷慶教授時與國吳國倫爲叅藩特器重之陞南雄推官分權梅嶺橋滄洗兩稅歲課巨萬不私一錢兩臺

及郡守共歎羨焉三載以疾乞致仕年七十八卒康熙府志
方岑字高伯江都人嘉靖丙戌進士授大理寺評事陞
南京左寺正踰年出知杭州府先是海甯令某於巡按
御史爲肺腑親引用巨猾六七人恣營奸利度叢民怨
乃逮六七人者下獄夜使人殺之以滅口事發憲臣下
岑接驗得實庭笞逐之岑亦竟爲御史陰中罷免岑爲
文宏博出入左氏韓非劉向諸家詩宗初唐而風骨不
衰然好用古文奇字人多不辨亦其癖也平生撰著極
博草多散逸止存竹素齋集幾十卷萬曆府志
蔣應奎字文煥先世故江都人以永樂初戌大同遂家

大同嘉靖乙酉舉山西鄉試丙戌成進士授工部主事
分司呂梁陞郎中改營繕司董九廟慈慶慈甯諸大工
告成賜銀幣陞太僕少卿久之陞應天府尹時鎮田萬
畝荒弗治稅悉徵之里人應奎親往勘爲出金築堤召
民開墾成腴田以免里人困累至今使之困都察院右
副都御史巡按遼東請發內帑築邊牆二百餘里僅四
月竣工省費萬計陞兵部右侍郎協理京營戎政致仕
歸江都行李蕭然性嗜學手不釋卷語天下事歷歷如
指掌清修鯁介其天性也乙丑卒葬於江都縣之馬鞍
山萬曆應揚州府志

曾銑字子重江都人嘉靖八年進士授長樂知縣徵爲御史巡按遼東克定亂軍擢大理寺丞右遷僉都御史巡撫山東俺答數入內地銑請築臨清外城工畢進副都御史居三年改撫山西經歲寇不犯邊進兵部侍郎二十五年夏總督陝西三邊軍務寇十餘萬騎由甯塞營入掠延安慶陽銑率兵數千駐塞門而遣前叅將李珍搗寇巢於馬梁山陰斬首百餘級寇聞之始遁時套寇牧近塞居民不敢樵採銑方築塞慮爲所擾乃選銳卒擊之寇稍北間以輕騎入掠銑復率諸軍驅之遠徙詔增銑俸賜銀幣有加銑念寇居河套久爲中國患上

疏請以銑卒六萬鎗手二千每歲春夏交攜五十日餉水陸交進直搗其巢爲一勞永逸之策條八議以進是時銑欲西自定邊營東至黃甫川一千五百里築邊墻請帑金數十萬期三年畢功疏並下兵部部臣難之詔曰銑倡恢復議甚壯其令銑與諸鎮臣悉心上方畧予修邊費二十萬銑乃益銳合諸臣條上方畧十八事已又獻營陣八圖並優旨下廷議廷臣見上意向銑一如銑言輔臣夏言欲倚以成大功主之甚力嚴嵩與言有隙欲借事傾言乃極言套必不可復陰詆言以激帝怒旋復顯攻言謂向擬旨褒銑臣皆不預聞兵部尙書王

以旂會廷臣覆奏遂盡反前說言套不可復帝乃遣官
逮銑然無意殺之也會咸甯侯仇鸞鎮甘肅以驕恣為
銑所劾逮嵩故雅親鸞乃代鸞獄中草疏誣銑掩敗不
奏尅軍餉鉅萬遣子潛屬所親賂當途其言絕無左驗
乃竟擬斬即日行刑銑既歿家無餘貲隆慶初給事中
辛自修御史王好問訟銑志在立功身罹重辟識與不
識痛悼至今詔贈兵部尚書諡襄愍

橫雲山人史稿

徐子麟字瑞卿其先自甘州徙江都子麟以太學高等
補貴州都司經歷未幾移雲南都司經歷委理五井鹽
課為前官補負課千餘緡前官卒又倒橐助其喪還陞

澂江通判晉烏撒同知會苗兵亂諭以大義諸苗帖服
無何被讒論罷子麟欣然曰麟待罪邊徼二十年今得
生還幸矣歸築一草閣與諸舊好以琴書為娛後竟以

貧死 萬歷縣志

桑喬字子木江都人嘉靖壬辰進士授戶部主事督草
塲稅宿弊頓清尚書梁材稱其練達老成吏部侍郎霍
韜亦器重之改監察御史按山西時大同初定渾源失
守邊民被傷者甚眾喬躬行塞上掩骼埋髑劾將臣魯
剛李懋輩失機正法州邑被兵殘破者疏免其征賦又
諫止車駕毋巡邊及籌邊方畧十餘條代還適奉天殿

增修七身集元 卷十二
災陳時政并劾禮部尚書嚴嵩兵部尚書張讚戶部尚書張雲工部尚書林廷楫詔罷雲廷楫而留嵩讚時帝方眷注嵩而喬疏論之且連四大臣直聲震天下嵩大銜恨已亥上幸承天疏請留不允扈行在改巡按順天會邁寒疾疏乞骸骨歸嵩授指都御史王廷相令劾喬規避廷相素重喬不卽上嵩曰上怒且相及矣會經歷李鎔譖喬短廷相遂奏論喬逮赴詔獄廷杖幾死謫戍九江二十六年不歸念母老治廬迎養母後歸江都喬獨居一室惟一僕供掃除汲爨而已嗜易占得其微奧所著有廬山記二十卷真詮四卷詩文二十卷卒於戍

所隆慶初奉遺詔贈光祿少卿

廣陵十先生傳

何城字叔防隨父自榆林移家江都嘉靖壬午中陝西鄉試壬辰成進士改庶吉士授刑部主事時外戚張鶴齡等爲世廟所惡下車坐重罪城憫之寬其獄禁以是謫安州同知安居衛河下流歲苦澇田禾不登城白當道築堤防之後因號曰何公堤移徽州同知擢工部郎中方士陶仲文被幸其徒多不法城劾之皆遠戍出知武昌府楚世子英耀與所幸甘玉海謀逆城白巡按御史先擒玉海杖殺之散其護衛世子拭法并戮其黨陞山西按察副使分巡冀南道投劾歸江都會倭寇作亂

城創議築外城時多迂之未幾倭犯揚州城外煨燼於
是從議興築甫畢倭再至不得入引去民得安堵皆城
力也城與弟堅少從學呂柟共砥礪至白首不倦康熙志
曹守貞字子一江都人嘉靖戊戌進士知遂昌縣邑苦
採礦役守貞條上其害遂得罷庚子入覲同官傾之左
遷晉州判官攝趙州移知曲周縣皆有惠政陞工部營
繕司主事擢荊州關稅時遼庶人恣暴於荆守貞不爲
撓遷員外郎陞尙寶司丞典司者爲嚴世蕃與議多不
合謫山東轉運判官移饒州府同知久之擢南京戶部
郎中有頃京營訛言部議欲裁粟布軍士大關尙書患

之問守貞守貞移牒諸將士擇時日覈軍實稽詐冒給
糧布諸軍士相顧愕曰何傅之謬耶事遂寢出爲平樂
知府錄囚多從末減尋乞休歸閉戶讀書不預外事所

著有畸侔軒藁

康熙府志

崔縶字清甫江都人嘉靖癸卯舉於鄉授清苑教諭陞
靈壽知縣邑小而民狡悍令多不滿任或調或罷去縶
凡再考最民甚德之擢倅棗州乞歸故廬庫陋茹蔬飯
糲翛然竟日卒年八十七尙書劉先濟志其墓康熙府志

楊守誠字惟一江都人嘉靖丙午舉於鄉授南樂知縣
遷河南府判再遷益府審理所至有能聲致仕歸里與

副使何城力請於太守吳桂芳築揚州新城并瓜洲城以禦倭寇所著有防秋紀行稿屯鹽總議諸書康熙府志李承式字敬甫其先世自大同遷江都嘉靖丙辰成進士初任錢塘知縣以執法忤齟使者調深澤除奸吏稱神明擢兵部主事上封事八條皆報可尋備兵榆林法令嚴整壁壘一新陞陝西布政使以疾辭歸會倭犯朝鮮以承式有邊才召用多立軍功陞福建左布政使尋致仕惟汙萊數頃以供饋粥築一室湖上扁舟往來足不履城市卒祀鄉賢子植別有傳杜禮部郎中柄監察御史雲南巡按俱有政聲康熙府志

馬豸字伯直其先自大同遷江都中嘉靖壬子舉人授薊州知州州迫輦下賦役繁重豸拊循百姓多善政遷鎮江同知署丹陽篆丹陽故有馬嘶港溉田數百頃久淤填民廬其上旱澇爲沴百姓數請爲築黠者所梗力疏之三月工成民大稱便累遷河南按察使僉事嘗相視徐邳河知其勢必南徙條上防濬事未竟卒萬曆縣志李植字汝培承式子萬曆丁丑進士改庶吉士授監察御史十年冬張居正卒馮保猶用事其黨錦衣指揮同知徐爵居禁中爲閱章奏擬詔旨如故居正黨率倚爵以自結於保御史江東之首暴爵奸植遂發保十二大

罪帝震怒罪保明年植巡按畿輔請寬居正所定百官
乘驛之禁從之既而帝手詔吏部擢植太僕寺少卿廷
臣益忌植適帝欲卜壽宮於大峪山植謂其地未善御
史柯挺自言習葬法力稱大峪之美給事中王敬民等
又迭疏攻植遂貶植綏德知州引疾歸居十年起沅州
知州累官右僉都御史巡撫遼東植墾土積粟得田四
萬畝歲獲糧萬石戶部推其法於九 又奏稅監高淮
貪暴請召還不報後乞休家居卒贈兵部右侍郎

橫雲山人

張肖孫江都人祖鎧嘉靖間江淮饑輸粟千石助賑詔

旌以官肖孫萬曆丙子舉於鄉初令上猶再宰南平頽
疲邑難治而化其刁悍以循良稱官至長沙郡守

康熙府志

章潤字實甫江都人萬曆丁丑進士授浙江安吉知州

州故确瘠民悍難治潤廉敏通達因俗而導民以帖服
陞刑部員外郎著律例贅言若干卷陞江西瑞州知府
會歲饑盜起潤擒捕其渠餘悉逃竄境內以安陞四川
按察副使備兵松潘甫至幕下騎士謀作亂潤廉得其
主名陰授方畧擒斬之陞廣東右叅政卒於官

康熙府志

續志考正章潤萬曆丁丑進士選舉作庚辰

闕士選字儁甫江都人萬曆庚辰進士家世習戴氏禮

士子之治禮者皆宗之授蘄水知縣以不附張江陵阨
抑十年始遷南刑部廣東司主事多平反擢登萊兵備
道有巨盜柳廷瓚李東瀛等倡亂選以計平之晉山西
右印政使以勞卒官子汝梅

舊府志

續志考正士選萬厯庚辰進士選舉作丁丑

馬一駿字純甫號強吾江都諸生孝事母以選貢授安
縣知縣邑田仰給峴水水爲鄰州奪常苦旱一駿爲力
返之歲得有秋前令負庫藏萬金以歿逮繫典吏責償
累歲適一駿委運松潘糧餉有羨數千金舉以補之盡
釋被繫者又能讞疑獄出不當死者三人直指以爲賢

薦擢和曲州知州邑人德之舉茶稅一項爲治裝力却
之單騎抵州治其治一如安縣擢唐府長史告歸游優
林下幾二十年七舉鄉飲大賓年七十考終

康熙府志
泰本傳

蕭灼如字茹一江都人由選貢授廣東潮州通判職司
糧民多逋賦灼如盡爲請免歲饑捐賑存活甚眾巡按
周應知其才所至以灼如從凡有疑難詢之立剖潮關
有稅亦命其代理灼如設甌中庭令自投其中不問羨
餘巡按益重之將疏薦會灼如以積勞得疾告休卒祀

鄉賢

康熙府志

鄭茂華字實符江都人萬厯甲辰進士由部郎出爲浙

江按察副使時溫處多寇茂華至皆望風遁進廣西布政使廉潔不侵一縉時青藩爭立三司慮變諭以大義立解天啟間魏璫煽虐所在立生祠惟廣西不應其強項如此崇徵初舉卓異召對平臺稱旨陞副都御史巡撫廣西有土司陰謀起釁華指授方畧殲其渠魁諸桀驚者咸遵約束考績晉通議大夫御書天下清官於屏尋命攝兩廣總督以病乞休溫詔慰留者再歸里杜門未嘗營田宅卒贈正議大夫兵部侍郎廣西祀名宦上史啟元字蓋卿江都人萬曆甲辰進士授南戶部主事督淮閘稅尋移南吏部天啟初擢湖廣按察副使備兵

衡永會岷藩有變中使往勘羣宗譁甚啟元至數語折服遂定岷封粵寇闌入楚境啟元於廣贛孔道設木蘭臘嶺二關募兵守之賊不得奔逸殲其渠魁脅從解散境內獲安被病乞休歸臥林下嗜書臨池不輟年八十卒祀郡鄉賢

馬呈秀字君實其先大同人隨父業鹽筴籍江都呈秀早孤嗜學登萬曆甲辰進士未拜官卽疏請終服養除官大理寺評事凡奏疏諸牘援引經傳同列悚服出知延安獬賊入境親督兵捕擊擒其渠魁治延五年收復流民萬戶墾荒田數萬畝入其租爲民充逋賦尙書趙

長化十身... 彥稱之陞福建按察司副使擒礦盜有功祀福建名宦

朱家民字天民江都人以祖戍滇南遂家曲靖萬曆丙午舉雲南鄉試初知涪州舉卓異轉湖州再移直定舉邊才擢貴陽守值安酋叛圍省會餉道俱絕家民羅雀捕鼠以死自誓乞援募兵卒解黔圍丁外艱奪情陞副使轉按察使讞獄多從末減圜圉皆空尋進貴州左布政節省帑銀六萬兩憫滇黔道險風濤飄溺製飛鉅鎔鐵橋以通往來四省道里遼濶洞猺劫掠行旅家民築連雲等十一城修山路千餘里崇徵庚辰入覲召對賜

金帛敘平黔功推宣大巡撫以年老乞休子潮遠官漳

州都督

同上

馬賓字國光其曾祖龍人推長德賓爲兒時卽負文武大畧乙酉史可法督師維揚畫戰守十六策謁軍門史公歎息曰恨遇此君晚不獲早見之施行危城中何從得此才李贊皇陳龍川一流人會時事日非隱居教授以身爲率不言而人自化之著述十數種手錄書尤富中更喪亂僅有存者

本傳

王納諫字聖俞江都人萬曆癸卯鄉試第一時陶望齡主試王思任分校得人稱最盛丁未成進士授行人出

使榮藩辭樂卻餽榮世子敬禮之以疾假歸家居三載
吏部司官缺人爭營之尙書某曰吾知有下帷著書不
干進者王君可任也起爲吏部主事力疾赴召五閱月
歷四司疾益甚復請告歸田里匝月而逝所著四書翼
註學者皆宗之子玉藻崇徵癸未進士

康熙府志

張伯鯨字繩海江都人萬曆丙辰進士歷知會稽歸安
鄞三縣崇徵初稍遷戶部主事出督延寧二鎮軍儲自
黃甫川西抵寧夏千二百里不產五穀芻粟資內地賀
蘭山東抵花馬池素沃野亦荒蕪伯鯨疏陳其狀爲通
商惠工轉菽麥又倣邊商中鹽意立官市法以招之軍

民稱使盜起延綏伯鯨參巡按籌畫俘獲渠魁不沾泥
遂擢兵備僉事又破斬賀思賢一座城金翅鵬等巡撫
陳奇瑜上其功進右叅政及奇瑜遷總督遂擢伯鯨右
僉都御史代之伯鯨蒞延綏久視民若子以拾遺論罷
比大失望尋論功起用召爲兵部添設左侍郎攝尙書
事以疾乞休南還福王立伯鯨家居不出我

朝順治二年

大兵南下圍揚州與史可法分城固守

城破自破縊死

舊縣志本傳

朱希禹字砥中江都人萬曆間以貢入太學授新昌令
民桀驁難治希禹不事鞭笞一以至成化踰年民民大

悅服以勞瘁致疾不起卒之日邑人罷市比喪歸擁輻送者幾萬人

舊府志

倪啟祚字允昌江都人萬曆己未進士改庶吉士授編修同館姚希孟顧錫疇皆重之天啟間逆閹魏忠賢毒虐善類啟祚方在告聞之憤甚草疏論其奸狀會遭疾不果上旋卒

同上

姚思孝字永言江都人崇徵戊辰進士改庶吉士授兵科給事中卽首陳保固民心一疏言甚剴切又疏糾輔臣奪情罷歸後起太僕寺卿尋晉大理寺卿丁父艱返里思孝在諫垣前後上八十餘疏皆昌言讜論時望歸

重焉

康熙府志

俞都美字士中江都人由廩例入太學授安州州同州瘠而多水都美爲治隄梁歲饑捐俸以賑攝定興縣篆嚴絕苞苴時客氏子弟狂橫里中以幣交都美毀刺笞其使聞者危之隨乞休歸草衣蔬食不干俗事惟雪髯飄然往來里巷間清介逼人時人稱其居官不媿長孺林下宛似淵明年六十七而卒

同上

車從軾字五車江都人以明經授太平府訓導郡值兵變御史毛九華委從軾守陣禦敵動中機要兵燹之後修文廟補輯器血藏書從軾皆預力焉

同上

閻汝梅字和陽布政使士選子也崇徵辛未成進士卽
署門自戒不預外事授陽穀令居官清慎擢刑部主事
初汝梅舉於鄉時知府劉鐸以詩觸魏閣被逮人莫敢
往汝梅獨省焉鐸貧爲緹騎所窘歸質百餘金以贈又
勸紳士爲助有願輸金不書名者汝梅晒曰有不測我
獨任之奚慮焉其忠直天性然也同上

徐葆初字元赤江都人崇徵甲戌進士例授部主事以
親老乞改南工部時流寇燬鳳陽陵寢尅期復建估費
四十餘萬金工部尙書劉定國疏薦葆初督工役未三
載竣工止費二十餘萬金朝廷嘉其廉幹擢本部郎中

康熙
府志

鄭元勳字超宗先歛人家江都崇徵癸未進士以母老
家居甲申三月聞變痛哭出家資募勇俠貽書當道謂
宜建大師統精銳以守河北會福王立興平伯高傑鎮
揚州傑與元勳有舊揚民喧傳元勳招傑來必蹂躪我
因閉城拒之傑怒縱兵掠城外將攻城元勳單騎入傑
營曉以大義傑爲心折曰前事特別將楊成爲之耳出
禁令退舍且誅楊成而楊民則誤傳爲楊城矣時巡撫
黃家瑞等會議於南城樓楊民洶洶持杖環列元勳至
下馬就坐爲言城外事由楊成語未畢而聞者遽升樓

攢办害之督師史可法斬倡亂者三人頭以祭元勳逾三日有兵部職方之命而元勳已及於難李清鄭職方

國朝陳卓字懋修江都人順治丁亥進士由刑部郎遷四

川提學僉事時蜀新定諸生文業荒廢卓出所攜經籍

令傳寫轉相教授由是文風日振按試保甯府值劇賊

劉文秀猝至卓乘城分守拒却之叙功擢陝西臨鞏道

副使復官商分茶之法辨部民受逆徇偽劄者民咸德

之再擢湖廣上荆南道叅政告歸卒祀鄉賢舊縣志

李宗孔字書雲江都人父濂性孝友為諸生有文名宗

孔登順治丁亥進士由部郎授御史改給事中晉吏科

都給事中疏前後四十餘上皆闕吏治民生每同九卿奏事侃侃直言不阿不附後請假回籍康熙三十八年

聖祖閱河南巡晉秩大理寺少卿

御書香山洛社額以寵異之子錦鑰孫夢同昺聲皆先後登科

第舊縣志

孫自成字物皆江都人順治丁亥進士知福建歸化縣

時閩廣初平旁邑多為賊壘自成蒞任甫數月招徠七

十餘寨民得以休息事耕桑焉歸里遇邑中利弊秉公

直言所著賦役管窺一帙條分縷晰尤為切要至今言

江都田賦者必採擇之舊縣志

張問達字天民江都人明末爲諸生值史可法守揚州
高傑以鎮將欲屯兵城內問達詣軍門力陳不可且曰
封疆至重公不可以畀賊可法怒其阻撓逮至瓜洲將
按以軍法有龔克初者從旁大呼曰此壯士可不殺可
法遂召入論時事改容謝之康熙五年舉順天鄉試適
科臣奏撤揚州兩東門城垣部識問揚人問達執不可
乃止尋署休甯教諭遷知趙城縣多善政罷歸以講學
終老問達於克初死後刻木主春秋祀之一日忽取生
平所讀書并木主焚之曰吾子孫不能讀我書又安能
祀吾友耶是夕無疾卒

舊縣志

鄭爲旭字方旦本歙人世居江都父元化積善行義爲
旭順治辛卯拔貢授中書遷工部主事權廣東太平橋
稅減耗恤商擢監察御史巡視東北兩城多所建白如
選官須加驗看視學應遣詞臣申講讀律令之條以厚
民俗分進士舉貢援例班次以疏銓政飭臬司遇命案
不得率結罪人發烏喇減等者卽中途遇赦並在部未
結諸人皆應照例寬恤等疏俱次第舉行卒祀鄉賢

舊志

郭礎字石公江都人順治壬辰進士授戶部主事監臨
清倉權蕪湖稅俱有聲出知順德府府東北有古大陸

嶽漲爲田廬害礎至先挑牛尾河三百餘丈漸濬大陸
黃楊諸口自是夏無橫溢其水可灌田數萬頃邢臺南
和各邑皆賴之又修學宮備祭器時與諸生課文藝焉

舊縣志

郭士璟字眉樞江都人父茂英歲貢生士璟順治乙未
進士改授常州府教授常士以逋賦株連被黜者甚夥
士璟按名清查得實爲免數百人擢助教遷工部主事
權九江關鈔差峻乞歸杜門却掃惟與故友數輩論文
賦詩以老士璟素孝友有餘俸分給兄弟及族人貧乏
者幼年初不事舉業以五經三傳二禮三史及莊列淮

南越絕書爲日課年二十始爲應舉文一落筆輒高人
數等晚年親課弟子著作益多有雜體詩文十七卷子

元鈺別有傳

舊縣志

金懷玉字式如揚州人順治戊戌進士授福建泉州府
推官時海氛未靖沿海州邑數十里外築墻爲界有踰
墻出者以通海論懷玉至錄釋繫獄千餘人白上官曰
此不過小民資漁利爲活者保無他也後數年弛禁人
咸服其得政體遷瑞州府同知

舊縣志

高凌雲字尺木揚州人少補諸生家甚貧假館授徒越
日歸省其家必從籬外聽聲息然後入恐妻子之饑且

癸也後窮益甚處之泊如益攻苦登順治戊戌進士授
嚴州府推官折獄平恕人稱長者旋告歸閉門課子樂
與後進講舉子業決科驗如筮卜士林服之子天驥康
熙辛酉舉於鄉官山陰知縣舊縣志

鄭爲光字晦中本歙人世居揚州父俠如明末官工部
司務有才能爲光登順治己亥進士改庶吉士授監察
御史巡視中城能禁強橫出冤獄以州縣賦稅叢弊請
設循環簿稽之剔揚州關鈔積弊及請科舉廣額收推
升實效節鳳米浮費諸疏皆報可卒於官祀鄉賢舊縣志
劉梁嵩字玉少揚州人幼傳其父有綸之學有文名中

康熙甲辰進士授江西崇義知縣甲寅賊犯崇義孤城
無援嵩募義勇身先士卒登陣固守擒賊七十餘人城
得不陷境內以安以勞瘁卒於官舊縣志

許承宣字力臣揚州人康熙丙辰進士改庶吉士授工
部給事中事首陳揚州水利賦役二疏辛酉典陝西鄉試
還京條奏秦晉間利弊六事並請刊

御製文集及廣捐修學宮之例悉見嘉納後假歸卒於家雍正

五年五月我

皇上舉承宣向所上水利一疏傳問揚人之仕京師者旋下江
南督撫酌行之先是承宣父明賢儆多才畧兄承宗

善繼父志視兩弟承宣承家無異財勉以專心力學一

門以內人稱孝友今明賢與兩子並祀鄉賢舊縣志

注楫字舟次幼有文名為儀徵諸生康熙十八年以贛

榆教諭舉博學宏詞授翰林檢討與修明史充疏冊封

球正使臨行陳奏使事七條至其國宣宗

天朝成德

為其國撰孔子廟碑默識尚氏世次撰中山沿革志

上於朝出知河南府置學田於嵩陽書院聘詹事耿介

主之擢福建按察使陞布政治績尤著內擢京堂道過

家得疾卒祀徵儀鄉賢所著悔齋詩山間正續集觀海

集舊縣志

張瑾字去瑕揚州人康熙癸卯舉於鄉除知雲南昆明

縣時吳逆初平民未復業瑾為給牛種招墾荒地請開

白沙清水馬裏三河灌之又於近郊三十里令民種桑

植民資其利聽訟片言立折案無留牘諸上官廉其才

守凡他郡有疑獄不決者悉下瑾理之滿三載將行取

卒於官百姓哀號送其喪者數萬人復請祀昆明名宦

縣亦祀鄉賢瑾居家篤於天性同弟琬事母孫氏極孝

與琬相友愛常上公車宿旅店夜半忽大哭同寓者怪

問之瑾曰適夢見吾弟共侍母側既覺思之不禁哭失

聲也宛字子炎邑廩生中康熙壬子副榜以文名於時

續志考正張瑾弟宛中康熙壬子副榜選舉貢生
內缺

王復衡字山公儀徵籍甘泉人以恩貢入太學爲孝感
熊公合肥龔公所器重居家孝友純睦宗黨中待以舉
火者常數十人孀姊二俱養於家待諸甥如已子儀邑
正賦外有五股差徭苦累復衡力請上官勒石永禁通
邑德之以中書需次主事及子貴累封朝議大夫卒年
八十六子誥丁丑進士歷官司經局洗馬督四川學政
文充癸丑進士改庶吉士歷處州知府諸子孫多登賢

書列明經以文學世其家

續志考正復衡以恩貢入太學選舉貢生內缺

唐詩字盛唐甘泉人父之天家素饒破產贖難民子女
以致匱乏繼伯氏爲嗣母萬氏孀居紡績教之讀書幼
善詩文工書法甘貧守素教授生徒至老得歲薦於榮
利泊如也中表某無子饒於產不肯與其弟願立虛券
授詩詩嚴拒不受其不以冥冥墮行類如此六子皆有
文行登科第仕版者五人紹祖繼祖繹祖續祖綏祖
戴夢麟字占弼其先籍山東居甘泉數世矣康熙丁巳
舉順天仕大理評事擢御史巡城以明察稱條奏刑部

不得自行各省提犯又請有司成讞時必宣布案犯供詞杜胥吏改竄之弊俱著爲令乙酉監試京闈請多備空白卷給士子一時遺誤者遂著爲鄉會場定例戊子典試福建稱得人累官至奉天府尹卒子思納康熙丙戌進士翰林編修思訓癸卯舉人孫汝槐乾隆元年山東解元汝棻雍正庚戌進士

史申義字蕉飲康熙戊辰進士改庶吉士授編修歷禮科掌印給事中以疾告歸幼穎悟於書無所不覽爲文宏深矯健不肯一字因人尤工詩初倣西崑既悔其少作殫力研索斂才歸法風格益上

聖祖嘗遣中使至直廬問翰林中能詩者誰爲最大學士陳廷敬以申義對焉同懷兄慶義字蔚奇康熙丙戌進士吏部員外郎

郭銖字山題其先由涇陽遷揚州父士璋孝子也早歿家甚貧銖事母孝而喜讀書康熙丙子舉於鄉癸未成進士筮仕內閣中書舍人稍遷司經局正字辛卯分校順天鄉闈號得士丁酉遷廣東瓊州府同知善讞獄攝新會令新會俗喜訟好鬪鬪每至殺人而行重賂於銖銖嚴却之置殺人者於法大盜某某出大洋行劫歸匿行伍爲窟穴且得官矣銖捕得之縛送大帥由是盜以

靖上官稔其才欲題擢大用以母老乞養歸至瓜洲聞
母訃一慟而卒子耕禮癸巳舉人耕仁羅城知縣
方覲字近雯召試供奉南書房康熙己丑成進士官翰
林視學四川葺文翁講堂爲書院集諸生肄業其內文
教大興雍正二年報竣改御史遷戶科給事中巡視船
廠條時務十一事皆報可又巡通倉屏羸羨剔銅弊以
廉幹稱

世宗常語輔臣以廷臣可任督撫者十人覲名在第五遷浙江
按察使署布政使兼視兩浙鹽法廉矢節益晉西安布
政使在道以病聞

賜人參及醫次六合晉太常寺卿卒

給帑五百金治喪

御祭一次子夢駟舉人夢騏由丞倅卓異知漢中府

唐繼祖字序皇甘泉人詩子素以博洽名康熙辛丑成
進士改庶吉士授檢討改禮部主事以薦擢監察御史
數有建白皆見施行遷工科都給事中巡南漕奏績復
使巡湖南北將還授通政叅議旋改鴻臚卿既入都卽
遣署河南按察使尋調湖北辨冤獄多平反爲楚人愛
戴以病歸尋卒家無餘財鄉人稱之

王琳徵歛縣人居甘泉由儀徵貢授廬江教諭預修江
南通志陞貴州銅仁令至數日平峒苗獄百餘件紅苗

肆逆三省會剿琳徵轉餉勞士民得安堵歷任七年卒
於官銅人祀諸名宦 本傳 以上原志

前志人物內子目甚多今但以年代為次不加分
析惟列女仙釋兩項未便散附仍另編于後

宋

李旦字世則廣陵人以孝謹質素著稱鄉里見法苑珠

林

陳

來法敏疑子海陵令

唐

來景業恒子虞部郎中

來敬業濟子潤州刺史

來慶遠濟次子中書舍人

上官庭璋儀次子太子僕

上官經野庭璋子德州刺史

上官詔經野姪侍御史

按元和姓纂經野弟經國經緯詔經緯之子

李正臣邕孫大理卿

李正叔亦邕孫工部員外郎

李璞鄜祖郵州司戶參軍

李暄一作暄 鄜父起居舍人

李拭舊唐書作桂 鄜子即礮父 歷宗正卿京兆尹河東鳳翔

節度使

李沈新唐書作沈表又作沈說北夢瑣言作澆 礮子贈禮部員外郎

王炎播弟進士太常博士即鐸父

王鎮播子秘書丞

王冰亦播子京兆府參軍

王鐸起子汝州刺史終太子賓客

王權蕘子兵部尚書見舊唐書新書表中有名無官

宋

李問字舜愈賜同學究出身主榮昌廬江簿歷吳江江

山縣以大理寺丞殿中丞告老遷國子博士善詩柳開

王禹偁並稱之前志經籍內載詩一卷未詳其人見王

安石墓志

李察問長子山南道節度推官

李定字資深問次子進士累官御史中丞詳宋史本傳

楊閱處厚父大理評事

滿涇進士前志選舉未載

滿建中涇子壽春縣令

滿執中涇次子字子權萬壽縣令前志經籍內載有詩

集其弟居中亦舉進士前志未載並見王安石墓志
王奉誼左武衛大將軍

王琪奉禮子大理評事

王世倫琪子鄭州管城縣主簿三俱見王安石所撰王
令墓志

徐元榆字仙材好學善屬文吏部賈黃中嘗試其書判
曰元白不足多也尤能詩詩數百篇號南歸集爲殿中
丞監揚州稅以卒曾鞏銘其墓

徐天錫元榆子天禧中進士主祥符縣簿改著作郎知
寶應縣改秘書丞王令銘其墓

呂淵溱兄舉進士官秘書丞見歐陽公集

李長民字元叔定孫兄正民前志有傳宣和中獻廣汴
都賦幾及萬言除秘書省正字南渡後寓海鹽卒賦載
汲古閣所刊揮塵錄跋內

楊湜符離尉見王安石集

王居修駕部郎

王居厚以兄居正郊祀恩任官

仲彥明迪功郎

仲將之贈正奉大夫二人爲仲并之祖及父見葉水心
集

張巖字肖翁大梁人徙家揚州宋史有傳累官至知樞
察院事嘗守揚州有聲舊府志載入泰州前志經籍內
錄其所著書兩種選舉進士內未載巖嘗跋清波別志
自署邢城張巖別志卽泰州周輝所撰也

張蘊字仁溥幹辦行在諸司糧料院歷禮部郎官前志
經籍載有詩集

劉玉信環衛總管見錢塘遺事

莫崙字子山號兩山江都人寓家丹徒咸淳四年進士
入元不仕見宋詩紀事及絕妙好詞箋註前志進士內
未收

丁開字復見長沙人負氣敢言咸淳間安撫向士璧被
問開獨詣關上書具陳士璧功大軍府小費不宜推究
忤貴似道羈管揚州以卒見谷音

元

毛翔江都人見元史孝友傳序內

盛如梓號庶齋大德間爲嘉定州教授以從仕郎崇明
州判官致仕前志經籍內載有老學齋叢談官教授日
嘗輯其詩文爲嘉定集一時文人多投贈之作

盛彥忠華亭丞

李君實松江提控案牘東維子有送盛李二人秩滿序

李之友秦文繹彥思並見序中亦揚人東維又有尙朴齋記爲揚人周信甫作其事蹟無考

王至善松江提控見貝瓊文集其子謙恒皆從瓊學有二子說在集中

彭架字仲宗一作愈廣陵人無書不讀學通五經性行純

謹言笑侃侃陳敬初深敬事之寓吳中授舉子業戶外之履常滿江左碩儒也見元詩選三舉

王禮字麟原帥府照磨明初徵召不仕禮工文見明文範內

史廷瑞字仲禎工騎射以才能見知張士誠拔爲親軍

校尉嘗抗諫士誠不納棄官歸性好施三族待以舉火者數十家年九十有五見史氏譜

明

顧翰字維周號雪坡道人夏國公成曾孫也之興祖嗣

鎮遠侯翰當嗣因遜其弟好讀書工繪事有米元章吳仲圭倪元鎮風而自得于繩墨蹊徑之外嘗作戲墨十七幅或曰雪坡道人或曰雪廬中人或曰雪或曰維周或曰怡樂不署姓名

李維禎大泌山人集

徐杲揚州人本木工嘉靖中崇道教屢興改宮殿杲多著力膺寵官至工部尙書又官其子爲錦衣衛百戶尋

奏請以所積賞銀堅尚書牌坊許之隆慶初毀續文獻通考
王橋字埜亭通經史兼習爰書嘉靖間以貢士謁選都
中楊椒山武部幕而納交焉每與深談詩事劾分宜五
奸十惡之疏參預爲多選河間知縣有惠政乞養歸里
邑民焚香祝送爲立去思碑以子廷臣贈昭義將軍廷
臣萬曆丁丑武進士任掘港守備時倭孽尚未靖申明
約束遂不敢犯遷汀漳都司俗素跋扈稍不得意脫巾
鼓譟廷臣鎮以威重翕然一變先是道遠不得奉母行
有報國憑孤劍懷親指白雲之句乞養不得請聞母訃
尋卒

張大倫字維序以貢生授浙江建德縣丞詩才跌宕富
春擅山水之勝公暇嘯咏意豁如也尋告歸陳繼儒嘗
序其詩有印亭詩集行世

田宏遇西安人行佑居揚州天啟中以女選入信王邸
信王嗣位册爲禮妃有寵授宏遇游擊將軍錦衣衛指
揮累加左都督

姚惠性好善明季游饑盡散所有以濟貧乏叔憐其困
分產資之復以散諸人嘗曰吾不忍飽在己而餓在人
也僕陳德當乙酉城破時惠之子嘉祥爲兵所執德哀
泣奔求遇諸塗遂偵伺其間偶守者懈解嘉祥縛自繫

雜眾浮中守者訝其不類德奮然曰母多問我願以身代遂死之姚氏累世祀焉

謝承貴字慕川子大才字燕山父子並以義俠著承貴當明季多故嘗挾貲走四方值流寇交訐冀一當以自效數年不歸大才尋訪獲遇勸以終隱卽歸課耕力農積粟賑貸里中大徭役獨以身任高傑之亂潰兵肆掠有數十人被難者逃至湖濱爲拊摩創痛洗血具食以全平生凡三致富皆盡散之父于俱高大年

徐宗麟字慧菴崇禎庚辰武進士官杭州游擊擢十六關副將聞甲申之變謝事隱西湖久之歸里與湖中高

士訂吟社沈酣于詩酒有物色之者作辭徵詩見志

高暲字孔昭邗佐子以蔭爲錦衣衛北鎮撫司僉事在職每論大獄多平反中貴嘗欲入人罪持不可因罷歸方中貴怒不測或危之暲子文瀾甫十歲揚言曰吾家故不怖死者文瀾字湖從初名堅例當襲部臣以聞思宗覽狀泣然曰此松山死難高僉事孫耶詔改今名暲于康熙間終其弟暲徽州同知署

國朝

畢銳字穎君康熙甲辰武進士官貴州平壩衛守備時藩帥有異志值平壩禾秀兩岐責令獻以爲瑞銳謬對

曰平壩舊有此非瑞也是年罷歸寄情詩畫所作山水人物得者實之晚年自號山樵尤精形家言得異傳地師莫能測也年九十終

謝翬字爾翼浙之會稽人未弱冠爲諸生有經世才轉側兵戎間議功辭不就與閩督姚啟聖同里相友善姚進討臺灣迎翬至幙爲悉心贊畫澎湖克捷姚議將官之翬笑曰本欲故人成不世功輕千里來公顧不知故人耶旣自京師遷江甯又遷江都而占籍焉工吟咏雅不欲與人問事惟日哦不絕口家人皆莫能測草書入懷素之室至九十三卒孫遵王讀書能文章康熙癸

已副榜貢生

張在澤字鵠止順治丁酉選貢入都同鄉王文通奇其材時滇南未靖大帥主兵者延之同往遂參幕事發策多中以便宜授三泊令遷安甯州危疆反側因俗爲理減徭薄賦尤善治疑獄擢慶陽同知守甯夏會大水毀城西南隅值王輔臣新叛預策必來攻城立議修築以三十七日工竣明年丙辰正月輔臣果悉銳至城下乘城堅守凡四十五日而圍解嘗輸糧至蜀棧道圯壞訪小徑捷出營中驚喜以壬戌擢守南陽未逾年告歸年七十六著有蟻夢集南征日記

史炤字燭九參政啟元曾孫讀書不事生產爲諸生高等與宗元豫汪懋麟昆弟相友善劇切娛情詩酒于進取泊如也古文綽有家法留心鄉邦故實凡忠孝節烈尤多紀述著蓆帽山山稿四卷

范荃本名恒美字德一五歲能作擘窠字甫就外傳卽解四聲爲偶句博學多文不應有司試教授生徒四方士爭出其門因而取科第者甚眾然僅制藝一體耳平時沈酣史籍商確風雅搖筆雲飛超然不羈自撰鷗鷗野老傳預書埋石曰今之石湖故又以石湖稱門下士甚象戒不得稱其師其後多以文著稱者亦僅得其舉

業一端而已與坦庵霞汀爲忘年交坦庵卽前志文苑內徐石麟也霞汀姓羅名煜字然倩與坦庵石湖以詞名著霞汀詩餘一卷唐中晚詩鈔行世

徐石麒字又陵一號坦庵博通經史精研名理好著書尤工詞曲出入白仁甫關漢卿之間於世榮泊如也漁洋司李揚州郡中名士無不入其門下石麒獨不往見李笠翁就訪終日嘿不與語同邑郭士環謂其感憤寄之詩賦滑稽則寄之南北劇乾隆丁酉揚州開局修改曲劇石麒所著傳奇具列經籍目內前志稱有趨庭述訓桃函待問北醒語天人升降圖說今考趨庭述訓則

錄其父語升降圖說特瓊錄中之一篇耳凡子元美字
懿公自知前生與叔石麒麟相慶唱有徐氏一家詞之刻
舉順治丁酉鄉試會有科場之獄 臨軒覆試用詩賦
六事在康熙二十一年

房永與崔家嘴農也不知書而至性過人母病割股進
之良已未幾父又病股不可復割乃破脅出肝以療父
亦愈然創甚父母未之知也督之力田潰踏於地始共
知之臥數日創合不死又數年病卒邑令龔公鑑立石
表墓

俞長城字甯世浙桐鄉人康熙乙丑進士以庶吉士授

檢討在館中文譽藹然眾相推重敦崇品節不逐時趨
干進未幾告歸尙未四十也在揚寓館時選輯百二十
名家文稿先正小題文三編及左國古文歷科程墨風
行海內後學咸衣被之遂入江都籍孫曾相繼爲諸生
者甚眾恩貢生大謨尤知名

胡期恒字元方江蘇布政使獻徵子由無錫遷揚以舉
人官翰林典籍出判夔州擢重慶知府不數年巡撫甘
肅旣以世家子諳習掌故遇事紛拏糾結者迎機立解
曲折中理時某將軍督關中甚橫顧重朝恒材期恒亦
屢挫其僕隸之負勢而凌暴者坐黨斥乾隆初出刑部

獄回里主梅花書院折節與名士酬唱為邦上題襟集
中先輩優游鄉社者十餘年卒先時蔡文勤以庶常在
告家居隱為所推挽焉

唐綏祖字儒懷詩第六子康熙丁酉舉人諸兄多貴顯
初宰河南封邱善析疑獄為總督田文鏡所知遇事不
阿累擢山東按察使河南災田請運山東粟助賑綏祖
以東省亦災粟宜留牴牾罷職入為太常少卿復按察
廣西升布政使罷又為浙江布政使罷又起巡撫江西
罷又為陝西布政使卒吏事精敏清強歷官三十年四
落職三對簿頌繫才掾上荷

主知以功名終折節好士識袁枚於未遇時終身感之
子辰衡雲南迤西道倚衡山東濟南知府

陳元度字武岡康熙丙戌進士祖輔世以順治辛丑進
士觀政刑部元度初選赤城令邑在宣府為邊地土瘠
民勞時軍興旁午宣郡歲養橐駝五千餘邑派五百有
奇歲需草數十萬束例發官價束元釐元度獨倍與之
次年將運至陝凡木鞍草屨荆筐等具需牛二百餘頭
向取於民有牛者家立破元度日剝民以為功非義也
視民鎮而不救非心所安也因自任其費不需民一牛
一錢廉能聲大起在縣十年無三月罰俸之愆雍正四

年稽查各府縣倉糧同時解任者四十二員元度赴部引見

上問有虧空及借糶否皆對以無卽補河南陝縣八年擢刑部主事大臣將以御史薦引年歸子起唐河南陝汝道

阮玉堂字履庭康熙乙未武進士分鑲藍旗學習雍正初授三等侍衛旋出爲湖北撫標中軍遊擊乾隆元年調苗疆九溪營時湖南城步綏甯兩縣苗接辰州數百里肆出劫掠奉檄進勦玉堂相地勢積偵探直薄巢穴苦戰功多會總督張廣泗統制全師次第剗平生擒及

乞降者數千人總督欲盡誅其生口玉堂再四諫阻乃免其婦女及男子十六以下者自給口糧慰遣之以功擢衛輝叅將被劾歸十六年迎

駕高明寺起補廣東羅定協都司陞欽州遊擊卒平時雅歌投壺有儒將風長子承義隨宦嘗從殺賊敘功不受

劉謙字子牧雍正甲辰舉人生二十七日而孤母鄔氏見前志列女傳苦節撫養歷知河南沈邱封邱縣歸德府擢雲南驛鹽道引年歸在沈邱嘗發謀殺疑獄於城隍廟人詫爲神封邱地窪多積水損田廬下游界直隸

之長垣假道開渠四十里邑以不災鄰亦不壑渠成民
呼為劉公河守歸德值歲饑所隸九邑方府試憫士之
貧而跋涉也遍至其邑試之有積賊欲招饑民為盜皆
曰吾不忍負太守也在道任兩攝臬事悉心平反歸日
士民爭赴兩院顛留既至里周恤親黨擇子弟闢家塾
親與課督文酒談讌蔚然為後進之望姪元豐邑諸生
謹厚有才謙在官日多資其佐理

劉淑字慎修先世臨汾人隸揚州商籍性仁厚樂施兩
地族黨多資以贍給入貲官蘄州知州慈惠至不忍用
刑貧民有逋社穀者數盈千百時方引病謝職悉為代

納民至今感之載在蘄州志宦蹟中歸揚後加副使銜
子大臨以商籍生官鎮南知州孫道芳亦商籍生改入
甘泉

杜甲字補堂父于藩永定河同知前志未載有吏能甲起家
真定通判擢遵化州移通州又擢甯波知府連調紹興
杭州坐通州造冊事鑄級仍守河間告歸少喜讀書講
經濟尤以風俗人心振挈名教為先務在通斥故相魏
藻德鄉賢之主詳免以豁油酒稅之徵於坐糧廳者為
九門提督所劾刑部獄上無絲毫染以此擢知府在紹
興葺劉戴山祠刻文集并恤其裔時有議斂錢修三江

顯者甲以爲派擾病民腫工不易輕改遂止河間故無
書院特創立之境有魏奄祖墳香火院立命踏碑夷壠
修故明死節衛輝卜總兵從善墓并繪野寺尋碑圖廣
傳其事所屬景州水城將圯馳往守禦得保悉心賑恤
吏不能欺所歷州郡皆盤錯處分左降之案無歲不有
先後大吏李敏達孫文定高文定方恪敏咸重其才守
別白護持卓有理效家居與里彥相賡和爲樂子鶴齡
汲縣知縣錫齡福清知縣

徐沅字德樹郡諸生廉隅敦飭孝友性成士林交重其
品乾隆元年公舉孝廉方正翕然推服與江都史芳淵

並稱得人晚年望益高鄉黨咸矜式焉

金甲字龍杼爲諸生積學未遇以志館議叙授廣西桂
林府經歷中丞鄂公重其品學破格延主省會秀峯書
院造士極盛屢攝苗疆邑篆懲奸誅暴民苗帖服擢貴
州安南令亦苗疆也俗有蓄婢而老不遣嫁者出示嚴
禁以年二十四爲限否則罪其家長俗遂革以暇設書
院親課生童文風翕然一新攝永甯州事歸幾不克具
橐

楊開鼎字玉坡少有文譽秀出儕輩乾隆戊午己未聯
捷進士選庶吉士由編修改山東道御史巡視臺灣擢

刑科給事中出爲通州坐糧廳處州衛旗丁趙雲標等五十餘人以事將罹重愆委曲調劑得免帮丁皆尸祝之旣以戶科掌印簡直隸大順廣兵備道調通永道又調福建汀漳龍道吏議坐戰船漂沒鐫職尋又補湖南鹽驛長寶道攝臬司時桂陽安仁兩縣有誣陷大辟者獄上力爲昭雪調衡永道修復書院設義學反育嬰堂皆焯焯顯著者未幾卒所著有梯航文集巡臺日所刻通禪理晚自號叢竹居士註金剛經官御史時曾劾總督某匿災臺垣中多其伉直

管一清字配甯才藻穎異爲諸生試藝徧膾人口選入成均成乾隆己未進士館課每出儕偶上同年袁枚最推重之改官魏縣知縣補廣東增城適隣邑有伏莽招聚先事摘發有功赴部卒於旅孫粵秀字南英早孤年少擅文名同輩交推讓之以優貢舉順天壬子魁選工故事游歷大帥幕府者數年選奉賢訓導病不能赴尋卒有甌山詩集八卷時文多爲人弄藏未及哀輯以貧侘傺負氣抑鬱士林爭惜其晚也

汪漢倬字大章歙縣籍少爲諸生有名宿松朱書嘗序其詩入貲官刑部郎決獄平允以才出爲山東糧道屢攝藩臬事才識敏卓長白鄂中丞尤稱許之在德州創

建繁露書院士風翕然一新詩稿多散佚姪棣掇拾以傳

申甫字及甫祖貫西安居揚者累世弱冠才穎工詩文有名乾隆丙辰應博學鴻詞試不遇辛酉申順天舉人明年試中書舍人遂入內閣尋選入軍機行走謹密周慎屢不得志於禮闈耀內閣侍讀侍直既久尤諳練綜貫循資晉鄉貳向時同事者先後多登鼎甲秉節鉞歸然爲老成之望暇則與館閣諸公賦詩高會入叅樞近出總風雅極太平廊廟黼黻之盛尹順天嘗因公鑄秩至副都御史卒歷官垂三十餘年值軍機者終其身沒

後無以爲家總督畢沅爲選刻笏山詩集十卷其中書張馨字琢聞坦字芭田同胞昆弟也先世本陝之臨潼商於揚乾隆甲子歸應本省鄉試馨舉解首坦亦中雋明年馨成進士爲庶吉士壬申坦亦以會魁入詞林馨由檢討改御史擢戶科掌印給事分校庚辰會試坦亦主湖南乙酉試並稱得人相繼請假回里家素裕華貫清班友于式好學里中諸巨老爲文酒之宴冠蓋經過往來投贈不數洛社香山之盛論者謂與康熙間二許相埒然許猶絀於晚遇焉

秦鬻字序堂江都籍乾隆壬申進士由編修改御史入

年中七持文衡門下士多至公卿出爲湖南岳常豐道
告養歸里宏獎汲引爲後進矜式負江淮耆宿之望者
數十年子恩復繼入翰林

李道南字景山早孤母氏辛苦教督與兄雷更相砥礪
貧至不能具炊嘗賦有斷鍼吟海內名流多詠之性高
介族中有富者一不顧其門爲文宗尙先正隆萬以下
不論也學日益有聲己卯登江南魁選已逾四十矣辛
卯會試擬元等改第二處揚浮華之地束身圭壁從不
稍一降志以行誼策勉學者屢主書院非僅沾沾文藝
也座主劉文正公亦極重之晚不謁選弟子受業者甚

眾嘉慶十二年里人公請崇祠鄉賢舉子甚遲本善元
善並諸生

吳本錫字汝藩乾隆丁卯舉人少貧無家孤身客游爲
諸生文名鵲起壬申以大挑官和州學正性樂易和坦
學者如坐春風升穎州教授畱愛於和而家焉擢廣西
馬平知縣未赴歸里中迎請課讀賦詩自得風格雅近
白傅康節以暇青鞋布襪散步嘯傲超然在塵埃之外
子應溶廩貢生

唐侍陸字贊宸以祖綏祖廕遍判挑發南河補山盱通
判少習祖父之教諳練通達悉心河務得其原委上下

河淮數千里緩急分合堵防宣洩之宜一一皆有準程
河臣無不倚賴之累擢隕陽知府以本生母艱歸會阿
文成公在豫治河專摺指名請發補開歸道未幾丁嗣
母艱補河北道又丁本生父艱補運河道兩次皆將屆
服闋奉

特旨補授勤能之績先後河臣保薦

簡在有素也調充沂曹道以公謨降級遂歸家居課子
弟嚴禮法肅然周旋故舊親族藹然煦然優游林下者
十餘年子瑩戊午舉人

趙宗武字京西庚寅舉人大挑分發湖北署武昌縣有

廉直之稱改湖南補龍山縣縣在山谷中值鄰邑教匪
煽動先事防衛境內安謐因公去官復補安化卒

周兆蘭字香泉戊子順天舉人由中書改知太湖縣有
吏能五十一年邑旱饑民采蕨於城東之唐家山掘地
得黑米千餘石民取食之頗賴以全活大吏緘所獲米
上其事

詔付膳房

御製五言古詩一章紀之擢兆蘭官知甯都州以公謨
鐫秩歸貧無以爲家子振智廩生

以上續志

汪兆宏字文錫甘泉人九歲能文既長博極羣書尤究

心濂洛關閩之學中乾隆三十九年舉人五十四年進士以知縣用改就教職選鳳陽府學教授生平不苟言笑父疾劇衣不解帶者九閱月母時近七十朝夕奉侍歿後盡哀盡禮鳳陽向無學田學署久圯捐俸修葺貧無所賴上官欲代謀薪水力辭之引疾歸課徒爲活誘掖後進多所成就卒年八十二道光十年入祀鄉賢子炳生道光元年舉人

述行

張宗泰字登封號筠巖甘泉人拔貢生考取一等以知縣用因父年邁改就教職選天長縣教諭訓士以敦品績學爲先境內有水旱災派委查驗務使實惠及民巡

撫朱文正公將以知縣保用力辭免嘉慶十六年奉父諱服闋再選合肥縣教諭農家有貞女就義特請

旌

表以勵風化年七十六引疾歸著有周官注毓正誤爾

雅注毓正誤乙部考日長編俱付梓舊唐書疏正春秋左氏傳讀本正誤新唐書天文志疏正竹書紀年校補廿二史日食徵唐令夏兩至攷宋金遼元朔閏考俱藏於家天長縣志稿後亦刊成

畧

黃洙字依宣號澹人甘泉人中乾隆五十三年舉人五十五年進士授內閣中書居京師不樂事權貴歸主如臯雉水書院講席嘉慶初改官知縣歷官山東清平泗

水陽穀肥城章邱諸縣均有惠政大吏重之後官汶上
縣值白蓮教匪作亂鄰邑皆陷洙獨嬰城固守請援兵
至城賴以完逾年以勞卒於官著有四書經注考證滌
人詩文集藏於家

狀

徐寅亮字直生號雲淙甘泉人少穎異能文乾隆五十
四年與兄元方同舉京兆試嘉慶四年成進士授兵部
職方司主事游升郎中奉差隨視南河西番操守廉潔
十一年授山東道御史以南河事日棘費日糜片三上
封奏其數陳碎石坦坡護隄事尤切時務兄元方字春
泉官中書同居京師友愛日篤元方引疾歸寅亮嗣亦

乞假返里向居邵伯鎮北隄埝決力籌堵築暑中往返
遂以病革卒年五十有五子玉華附貢生玉豐道光十
八年舉人二十一年進士授編修官至詹事府右贊善

二十九年順天鄉試同考官

狀

毛夢蘭字緘齋號秋伯甘泉人嘉慶九年舉人十四年
進士歷任湖南邵陽沅江武陵湘鄉湘潭知縣其初任
邵陽也年末三十清慎自矢務求實惠及民旋膺卓異
歷調劇邑興水利課農桑倡建善堂修復昭潭書院聽
政之暇手不釋卷上官咸推儒史嗣因案被議遣戍道
光元年奉

詔釋回時年四十主講淮安奎文書院者三十五年因材而教

歿後門人請祀書院並於學廡附建專祠著有華花

屋詩文集十六卷雜著四卷幽風全詩一卷弟瀚字季海道光二年順天舉人考取國子監學正升助教尋授四川巴州知州任長甯等縣所至著政聲以母憂去職服闋改發陝西歷任乾州隴州甯陝廳西安府同知時粵捻交訐江南北暨皖楚各營軍火由陝協濟每奉檄督辦籌應無誤保升知府

賞戴花翎以勞瘁卒於官年六十二著有燕臺入蜀秦隴紀游

草若干卷荆花書屋金石錄四卷

家傳

汪喜荀原名喜孫字孟慈甘泉人拔貢生中子中歿於西湖葛嶺喜荀甫九歲嘉慶十二年舉於鄉援例爲內閣中書升補戶部山東司員外郎請於管理部務大學士英和奏免河工徵民積欠八十二萬兩江蘇巡撫議以儀徵攔潮閘改駐新城增設羅泗閘喜荀以重徵擾民議駁載入則例時又有議增浙海關稅肩挑步擔一例征收者有議以儀徵商船飭令繞道至瓜洲交稅者皆力止其議丁母憂服闋道光十三年入都奉

旨發往東河學習河督栗毓美深倚重之保奏以知府用二十四年矣公合龍奉

旨賞加道銜二十五年補懷慶知府下車之始日坐堂皇審結積案百數十起河內縣民李百幅調戲李遂姐羞忿自縊始則其母受賅匿報既而需索未遂屢控經年喜荀悉心推鞠盡得其情抵李百幅於法李遂姐得

旌曲暇輒巡行郊野問民疾苦修葺懷書院課士首以經史文風稱盛郡境濟水盛發下游爲沁水頂阻旁趨官道滙注成河每逢大雨溢出爲患喜荀飭將舊河身及四門城濠逐段挑濬濟河遂復故道又行沁流至王曲村分水六道近水七八十里田畝得資灌溉居民立碑頌德名曰新開汪公河二十六年大雨浹旬沁丹並

漲喜荀率屬竭五晝夜之力加築民隄捍禦無患親赴被水村莊查勘撫慰倍至時河內濟源兩縣饑民捨糧者眾善荀命富戶煮粥分賑之由是闔境皆安決年復值大旱喜荀深入大行山步行六十餘里至白龍潭取水歸郡始得大雨遂以積勞病卒喜荀博覽羣籍於文字聲音訓詁多所究心政治沿革得失留心講求爲文皆有關世用著有

國朝名臣言行錄經師言行錄尙友記從政錄孤兒編且住菴詩文稿若干卷子保和字綏伯諸生通左氏春秋能傳家學行述

劉銘字箴山嘉慶十五年舉人選江陰縣訓導在任二十餘年樂引後進寒畯多所成就世居邵伯值洪湖水溢大令委監築馬家圩隄工自備資斧晝夜罔懈工賴以成著有日新樓詩集子倬道光十五年舉人選六合縣訓導值粵寇猝至督率巡防不遺餘力以勞卒於官

昂南咸豐二年舉人狀行

徐玉舉字青霞甘泉人嘉慶十八年舉人任刑部河南司員外郎升奉天司郎中官刑曹凡十七年遇疑獄未嘗刑求卽應笞者猶惻然曰何不自愛至此同官暨吏胥每稱爲菩薩人也至案稍可議又必虛懷辨難不隨

眾論轉移因足疾乞假歸主講廣陵書院里居八年卒年七十有七玉舉夙工制藝海內號名師者多頃心折服其居京師四方從遊者眾捷科第以百計著有雲川閣時文七卷試律一卷茗香齋吟草一卷雲川閣隨筆六卷刑部彙案稿若干卷子根道光二十年舉人述行

黃廷範字文楷甘泉人嘉慶二十四年舉人道光十五年進士歷任山西平遙曲沃臨縣所至有循聲其令臨縣也有冤獄未決將解任紳耆裴文經等率五百人遠八百里赴省請留案內要犯聞之出而自首其接人公感人誠有如此

王桂字秋卿甘泉人道光元年舉人九年進士改吏部
文選司主事考充軍機章京游升郎中掌京畿道御史
十九年典試湖北二十三年典試貴州京察外用任直
隸廣平府治績稱最因病致仕著有玉笙樓文集賦帖
子榮紱字小秋道光二十三年舉人官直隸蔚州知州
捐升候補道先卒著有袁文箋正補註孫錄書同治元
年舉人工部主事

徐雲瑞字書祥號曉村甘泉人道光五年順天舉人九
年進士改庶常授編修兩充會試同考官十四年典試
湖南湘鄉相國會文正公出其門京察外用任直隸永

平府著有政聲年五十七卒於官兄雲誥嘉慶二十四
年舉人弟雲煥副貢生皆工制藝後進知名之士多出
具門狀

蔣照字蔣村號文若甘泉人以優貢生中式道光二十
年舉人揀選知縣咸豐六年湖北巡撫胡文忠公調辦
糧臺參畫軍務悉中機宜歷任繁劇有聲保薦以知府
用

賞戴花翎同治元年署荆門州事明於聽斷案無留牘訪獲痞
棍悉置之法乃示諭曰民害不除牧之責也國賦不完
民之責也吾爲爾除害爾毋使我爲催科累累不三月

增修甘肅通志 卷十二
錢漕全完京山鍾祥皆毘連荆界捻逆窺擾乃勸督紳士補城垣備礮船添義勇賊知有備不敢南渡又爲鍾荆二屬附郭疏河建閘啟閉通漢水以興水利工甫興而卒州人爲之罷市卒年五十有九三年入祀名宦祠

狀行

曹丙輝號俊三甘泉人道光二十九年拔貢授七品小京官分兵部學習咸豐二年中順天舉人三年乞假歸里值粵匪陷城奉親居鄉時皖撫福濟檄佐戎幕皖當四戰之衝其捷柘臯復廬郡及剿無爲諸州縣籌策之力居多游升主事員外郎擢知府七年分發山東大吏知其能委以營務以防守省城功

賞加道銜充沂曹賊匪充斥復屢加剿克殲賊於淄川吏昌沂州白蓮池等處

賞戴花翎加運使銜同治二年署東昌府初下車招集流亡捕搜賊黨鄰境逆者王振聲潛謀應賊偵所在擒斬之郡人驚爲神時巡屬邑問父老苦病增書院膏火不踰年百廢俱舉三年補授東昌府火河以南捻匪出沒無定河北州縣恃河防以爲固丙輝每聞賊警輒露次河干扼守四年六月冒暑嬰疾卒年僅三十有八得

旨照軍營病故例賜卹

增修身身志 卷十二
贈光祿寺卿大祀名宦祠弟煒同治二年進士官翰林院

編修行狀

殷如璧字連夫號笠漁甘泉人由縣丞保升知縣並因勦賊叙功累保直隸州知州

賞戴花翎歷任河南孟縣舞陽陳留杞縣南陽等縣為治以鋤

豪猾恤鰥寡敦勸農桑表章節行為急務尤喜講求水利舞陽自澧水決隄數十年未堵築如璧尅期鳩工四月而畢地盡涸復畝收數倍省垣開惠濟河道經陳留到任彌月悉為挑濬又疏通伊水睢水等渠水患盡除邑人感之名其渠曰殷公渠同治九年補陳留縣調任

南陽在任自奉儉約愛民更恤寒士修書院捐學田葺節孝祠興養濟院施粥散藥遇有親友皆推解咸宜所莅各邑值兵燹災歉之餘興利除害事無不舉以積勞致疾卒年四十三大祀南陽縣名宦祠

府續志

陳昇號歐村先世籍餘姚祖德避元亂居邑之北湖豐樂鄉周家樓周太保光奇其貌以女妻焉德生禮禮生源源源昇世敦孝義睦姻任郵無弗至湖濱有僧道橋既圯昇倡費修之躬督工作易名曰河口橋今稱公道橋又徧修雷塘諸橋澹於名利以經術課子孫科第蔚起為湖鄉士族最子瑤歲貢生處州同知孫銑知歸安

縣紹思郡學生紹伊邑增生紹益歲貢生虹縣教諭曾
孫世運內閣中書世傑武舉湖州總運匡世郡學生時
濟魯王府教授時汲夢鶴夢日俱郡學生夢雷禮部儒
士維世國子監生卓嘉誼並順治丙戌舉人嘉誼官冀
州知州卓以丁亥聯捷成進士由刑部郎官四川提學
僉事時蜀新定文學久廢卓出所攜經籍令傳寫轉相
教授按試保甯劇賊劉文秀猝至卓乘城分守拒卻之
叙功擢陝西臨鞏道副使再擢湖廣參政卒祀鄉賢紹
孟子輔世順治丁酉舉人辛丑進士觀政刑部子廷相
邑增生康熙甲子

聖祖南巡獻賦河干被

召試著有詩文合集若干卷子元度康熙壬午舉人丙戌進士
知直隸赤城縣事西事方興宣府所轄各邑歲需畜養
橐駝若干供轉運赤城例分五百餘匹需草數十萬束
官值每束三釐元度獨倍給之駝運於陝凡駝所需需
牛二百餘頭先是悉取諸民民先期鬻牛以免元度傾
廉俸應其役不取民一牛民以不困在赤十年無虧帑
受

世廟之知調補河南邲縣擢刑部湖廣司主事冢宰靜海勵公
少司寇平江吳公稱其廉能薦爲御史以老乞歸年八

十三卒子二長起唐河南陝汝道次起夏侯選知縣起唐之子縑乾隆庚午舉人應暄雲南元謀縣知縣應詔山東東阿縣知縣陳氏自歐村以下凡九世邑人焦循爲之傳

焦循曰余泛舟黃子湖每過所謂歐陽墩者相傳爲陳氏老墳而未悉其何如人閱明崔桐東洲續集載歐村陳君墓志其銘曰有墩歐陽千載所藏乃知陳氏老墳卽歐村葬處也本東洲所志備錄於篇

范凌靈字雨村號膏菴邵伯人父章程乾隆戊申科舉人五上公車不第絕意科名惟獎掖後進老而不倦凌

靈天資穎悟克承家學事親以孝聞年十七入邑庠食廩餼受業於韋酉山大令佩金吳穀人祭酒汪劍潭太守之門早年與儀徵吳文節公文鎔卞光和方伯士雲諸老輩相切磋故學有根柢中年遊大梁燕薊吳越獲交天下士兩膺吳文節公學幕之聘襄校矢勤司衡者倚以爲重在京館徐梅橋尙書家下帷勤讀不驚聲華惠南北鄉試二十次屢薦不售義命自安道光中太傅阮文達公

予告歸里重凌靈學延課諸孫咸豐紀元薦舉孝廉方正不赴晚年益以誘進後學爲志同治三年孫韻武太守復

興廣陵書院延主講習多士景從七年重遊泮水生平
家貧好施予族中有老而無依者恒筆耕以周卹之性
耽吟咏詩宗少陵著有湖東集四卷行世歿後其孫用
賓輯遺詩遺文各一卷燹餘集詩一卷待梓卒年八十
有四子顯祚諸生顯祿文正公祠奉祀生孫用賓同治
庚午科舉人大挑知縣改就教職曾孫復昌儼
林溥字少紫號堅園性孝友少稟母教稍長以名節自
礪家素清約道光丁酉鄉薦庚戌進士用知縣分發山
東因親老告養避居於西山怡然以樂道爲懷母沒盡
哀三年不御酒肉有廬墓終身之志繼以公檄所迫屢

權縣邑時適賊氛竄擾籌畫防守相度機宜克保危城
心力交瘁繼補卽墨令勤政愛民六年如一日都人士
稱爲賢父母焉迨以卓異升東平牧蒞任後親督修濬
黃河口興築堤工朝夕罔懈漕艘賴以暢行政有循聲
進退不苟奉已甚約親族故舊有貧乏者必周之恩誼
篤厚望而知爲有道之士性嗜學自六經傳註外下逮
子史百家靡不披覽論學則以程朱爲宗以忠信爲本
夙喜爲詩著有暉吉堂詩集八卷子二振鐙縣丞隨任
守城卒次振爵浙江通判

張鎔字子陶少績學從丹徒劉孝廉頌芬肄業每一藝

成師輒驚嘆然小試以千數次乃得補甘邑弟子員性
 孝友丁父艱盡哀盡禮母卞太夫人病篤禱於神願以
 身代母病愈及後丁母艱服闋由訓導用知縣歷任龍
 門新河鉅鹿玉田長垣等縣通州直隸州薊州等州安
 良除盜聽訟催科勸捐團練諸大端無日不以愛民為
 念升補昌平州知州在任遇粵賊捻匪防剿盡心竭力
 連獲勝戰升用同知直隸州加知府銜並

賞戴花翎

翎加鹽運使銜以知府用卒於昌平州任年六十九歲
 子二長聯元縣丞次聯壽候選郎中俱卒孫文田姪聯
 桂任廣東潮州府知府以上新增

